

ROOM

O kiun vëh e' o kiun pe Pöl ne' to kiun ke ra napan va po vaman varih to te' voh ne Room. E Pöl to kiun o puk vëh e' he te' non Kōrin. Pare' vahik, ko he' e köövo ne to poka' voh ne e Fibi'. Ke' te' o kiun pamëh manuh pa vöön apuh va Room manih pa muhin va Itali'. Manuh Room to te' voh non a te' sunön apuh pa napan va Room, a ëhnaneah e Sisa'. A vöön apuh pamëh to apuh oah non a ma meh vöön va pa muhin va Itali'.

E Pöl to iu vavaasis non raeo pan, ea a napan kurus to nok voh ee pa taate hat pa matan e Sosoenën. Ivëhkëk, ea to hikta antoen no a tavus vavih pa ma kiu koman pea me a ma taate' vih pea. E Sosoenën se nok a ra ka tavus vavih ko ihan anoe këh en pea pa ma taate' hat pea, pa ö na se keh vaman varoe kuru e Ieesu' Kristo.

E Pöl to iu nö voh non Room pa vakikis a napan va po vaman to te' ne nën manih pa kiu pe' pa vatvus a soe. A napan va po vaman poë varih, a ma paeh va pee, ro Jiu', ka ma meh voh ro Grik. Manih po kiun vëh ne' to vavaato suk non a ma vavih pe' me o va'aus ne' to kon.

A ma kiun varih to tataki va ne manih pan.

A ma potan avih me a ma kokoman va po kiun vëh. 1:1-17

Ea kurus a napan no a ma taate' pea to hat, ivëh ka se taum o kamis manih pe Sosoenën. 1:18-32; 2:1-29; 3:1-20

Ea to hikta onöt no a taum koe in a kiu va pa ö ne Sosoenën to kon hah a ra manih pa pënton a ma soe vapenpen. Ea se taum koe varoe pa ö ne ea se vaman e Ieesu' Kristo. 3:21-31; 4:1-25

Manih pa vatös pea me Kristo ea se taum o to'to' voon me o to'to' tamoaan. 5:1-21; 6:1-23; 7:1-25; 8:1-39

A napan va Israel ivarih to koe voh ee pe Sosoenën, ivëhkëk, amot ne' se nok raeo kee hah ee manuh po kum pe'. 9:1-33; 10:1-21; 11:1-36

A ma taate' totoopin, ne ea a napan va po vaman se suksuk no. 12:1-21; 13:1-14; 14:1-23; 15:1-13

O iu pe Pöl, me a soe ataaton pe', me a soe vakikis pe'. 15:14-33; 16:1-27

A Pusun In A Kiu Ne Pöl To Nok

1 ¹Eö' e Pöl, eö' a te' kikiu pe Ieesu' Kristo. E' to vaoe voh a neo' pa nok a kiu aposol. Pare' vate' en peö' marën a vatvus a soe vih pe Sosoenën. ²A soe vih pamëh ne Sosoenën to soe vaman ke voh o

te' vanënën soe pe' pan, ee se kiun, ka soe pamëh to pet non po Puk Vapenpen pe Sosoenën. ³A soe vih pamëh to vahutët suk non e Sunai'eah vëh to tavus te' voh manih po vute' pa Te' Sunön vëh e Devit. ⁴Ka sun tane' hah pe' pa nap mët no a Tuvuh Vasio' to vataare va en pea manih pan, e Sosoenën to vate' poan vamanih pe Koa' koman pe', to te' me non o kakis apuh. E' ivëh e Ieesu' Kristo e Sunön pea. ⁵Manih pa ëhnan e Ieesu' ne Sosoenën to ururuan a möm, pare' he' en pemöm pa kiu aposol. E' to he' a möm a kiu pamëh, kemöm hara' vaeö rakah e nem pa nok a kiu vëh, pa vatvus a soe pe' manih pa ma kum te' to hikta te' ne pan ee ro Jiu', kee tēnan, pare vaman. Suk a ö nee se kë a ëhnaneah. ⁶Eöm me varih a napan va Room, eöm to te' hop e nem manih po vakum pe Ieesu' Kristo. E' to vate' voh en peöm, köm se vatet a soe pe'.

⁷Ivëh, kö' kiun nös a soe va'ih, parö' vanö ka nös neöm a napan va po vaman to te' nem manem Room. E Sosoenën to iu a no neöm, pare' vate' voh en peöm, köm tavus em o te' vivihan va po kum pe'. Eö' to hin suk a nös neöm pan e Sosoenën e Tamaara, me e Sunön pea, Ieesu' Kristo, se he' a neöm o vakamö', me o ururuan pe'.

E Pöl To Kehkeh Ep Non Pa Napan Va Room

⁸Vamomoaan nö' to iu soe vavihvih ke no' na e Sosoenën pa ëhnan e Ieesu' Kristo, suk eöm. Suk ataeah, a napan kurus va po oeh vëh to tēnan vahik voh ee po vaman peöm o kakis rakah. ⁹⁻¹⁰Eö' to kikiu rakah me no' sih o kupu peö' manih pe Sosoenën pa vatvus a soe vih va pe Sunai'eah. Ke Sosoenën koman to nat e non pan, a taate' hin peö', e' a man. A ma hin kurus peö' nö' to hinhin suk a no' neöm. Eö' to hinhin no' sih e Sosoenën pan, e'e' se va'aus a neöm. Ka ma tamoan nö' to hinhin no' eah sih pan, e' se keh iu non, e' se vataare a neo' ta hanan kö' nö nös pa ep ka neöm. ¹¹Eö' to soe va nën, suk eö' to iu rakah no' a nö nös pa ep a ma matëëneöm, marën a vaato me a neöm, suk a ma tah vih ne Sosoenën to nok voh ka ra. Eö' to iu va'aus no' a neöm pa vaman vakis e Ieesu'. ¹²A tah nö' to kehkeh soe rakah no' ivëh pan, eö' to iu no' a nö nös, marën a ö nö' se va'aus a neöm po vaman peö', köm va'aus a neo' po te' vaman peöm, ka se vava'aus hah a no pa sun vakis pa vatet a ma iu pe Sosoenën. ¹³Ken kea peö', eö' to iu no' a ö nöm se nat vavih va nem manih pan, a ma poen kurus nö' to kehkeh nö no' nös manem peöm, ivëhkëk, e' to te' non a tah to susunpip a non neo' pa nö nös pa va'aus a neöm, ko vaman peöm se apuh, pare' kakis. Eö' to iu rakah me e no' pa va'aus a ma meh va peöm pan, ee se panih, ko he' a ma to'to' pee pe Ieesu'. Vamanih pa ö nö' to va'aus vavoh a ma meh kum te' to hikta te' ne pan ee ro Jiu'. ¹⁴Eö' to te' me no' a ötop manih pe Sosoenën, ivëh, kö' te' me no' a kiu nö' se nok manih pa napan varih to vavatet totoopin ne a ma taate' po Grik, me ro te' varih to hikta te' ne pan ee ro Grik. E' a kiu me peö', pa nö manuh po

te' varih ro natnat vörep, me ro te' varih to hikta siku va'puh voh. ¹⁵E' a pusun in a ö nö' to iu vörep rakah suk no' a vatvus a soe vih pe Sosoenën manih peöm, a napan varih to te' nem manih Room.

A Napan To He' Tonun A Soe Vih Kikis Pe Sosoenën

¹⁶Ivëh, kö' hikta potpoet no' pa vatvus a soe vih pe Ieesu' Kristo, suk ataeah, a soe vih pamëh, e' a ö ne Sosoenën to kikiu vakis koe non pa kon hah a napan varih to vaman ne. O Jiu' to kon momoaan voh ee pa soe vih pe Sosoenën, ka kuru vëh no te' to hikta te' ne pan ee ro Jiu' se kon varu' ee pa soe pamëh. ¹⁷Manih pa soe vih pe Sosoenën no a taate' pe' a totoopin, a soe vih pamëh to soe non pan, a napan to vatompooan vavih me voh ee pe'. Ka taate' pamëh se tera' tane' ma' po vaman kikis pe Sosoenën, pare' öök ma' po vaman pa te', vamanih pa ö no a soe to kiun va non,

“A te' no a taate' pe' to totoopin se te' to'to' e non,
suk o vaman varoe.”

Hab 2:4

¹⁸Ivëh, ka nat vateera' e no po vakmis pe Sosoenën se tane' ma' manuh pa vöön va kin, e' se tavus vateera' po te' varih to nonok ne sih a ma taate' hat. Pare kokoaan ne a taate' man pe Sosoenën pa ma taate' hat koman pee. ¹⁹E' to maaka e non pan, ee to kokoaan e ne pa taate' man pe Sosoenën, suk ataeah, e Sosoenën to punö' voh en pa vatvus vateera' ea manih pee, kee nat vateera' e ne pe', suk a ma tah varih ne' to vatvus vateera' voh. ²⁰Taneo non po poen ne Sosoenën to nok voh o oeh me a ma moeh tah kurus, pare' öök non kuru, a napan to maaka e ne pa ma taate' pe Sosoenën, a ma taate' poë varih, a taate' vasio', me o kikis pe' na to hikta onöt no a ep. Ke' te' va i non manih pan, e Sosoenën to nok voh a ma moeh tah kurus, ka tah pamëh nee to maaka e ne pan, o kikis pe' to hikta onöt non a hikrom, pe' e' koman e Sosoenën. Ivëh, kee hikta te' me ne tah pusun in a ma taate' hat pee. ²¹Ee to nat e ne pe' e Sosoenën, ivëhkëk, ee to hikta kë ne poë, pare hikta nat ne pa soe vavihvih ke poë, suk a ma tah ne' to nok. A ma kokoman pee manih pe Sosoenën to örakuk ee. Ee to hikta onöt ne a maaka in a kiu pe Sosoenën, suk a ma komëere to popoen, pare nun. ²²Ee to sosoe ro e ne pan, ee ro natnat, ivëhkëk, ee ro te' o papön. ²³Ee to koe ee pa vasunön e Sosoenën to'to' tamooan, to te' me non o kikis. Ee to panih a taate' va pa vasunön e Sosoenën, pare këëkë vapiun e ne pa ma ta nö'nës, to matan va ne po te', me ro növan, me ro tah poa, me ra ma moeh tah varih to ëpëp vah ne sih po oeh.

²⁴E' a ö pamëh ne Sosoenën to vakmis suk va i rapoë manih, e' to vaonöt raoe pa nok a ma taate' no a ma komëere to ta' raoe, kee nok. Ivëh, kee nonok tane' ne a ma taate' hat to vapoet e ne pa ma sioniire.

²⁵A ma napan poë varih to koe ee pa vaman a ma tah man ne Sosoenën to vataare suk hah voh ea, ee to vatet vapiun ee pa ma taate'

piuk va pa vasunön a ma tah ne Sosoenën to nok voh. Ivëh, kee koe suk a ö nee se këëkë tamoan ne a ëhnan e Sosoenën. ²⁶E' a pusun in a ö ne Sosoenën to vakmis suk rae. Ivëh, ne' to vaonöt suk rae a vatet a ma iu koman pee. A ma taate' vapoet poë varih, ivarih, o köövo to koe ee pa koroh me a ma voe pee, pare koroh vapiun hah me ee po upöm köövo. ²⁷A pah taate' avoe' pamëh to te' öök e non pa kën voe. A kën voe to koe ee pa koroh me a ma köövo pee, pare iu vapiun e ne pa koroh me ro upöm voe. Ivëh, nee se kon suk rakah ee po kamis apuh pa ma taate' nee to nonok ne.

²⁸E' to te' akuk va kov e non manih, ee to vaörakuk e ne pa nat vavih e Sosoenën. Ivëh, ne Sosoenën to vakmis suk rae pa ö ne' to vaonöt rae pa vatet a ma kokoman örakuk pee, pare nok a ma taate' to hikta te' totoopin ne. ²⁹A pap napan poë varih to puh rakah ne pa ma moeh vu taate' hat. A ma taate' nee to nonok ne, to para' hat vörep, ka ma taate' poë varih, ivarih, a taate' puhio' o upöm te', me a taate' ip te', me a taate' vaheheve, me a taate' piuk o upöm te'. Me a taate' kokoman vahat o upöm, me a vasoe tonun o upöm te'. ³⁰Pare te' ne pa soe a ma soe to mirö' rakah e non pa ëhnëero upöm te'. Ko rës e ne pe Sosoenën, pare sisirö' te'. Ko kë peah koman hah a ne, me a taate' moko' rivon, pare nat vavih rakah ne a koman këh a ma taate' voon va pa mirö' ro upöm te', pare hikta iu tënan ne a ma soe pa ma tamëëre, me ra ma sinëëre. ³¹Ee to nonok pinpiun, pare hikta nat ne pa öt vakis a ma soe nee to noh me o upöm te'. Ee hikta nat ne pa iu a ma kën poëëre. Ee to rës e ne pa uruan o upöm te'. ³²Ee to nat ro e ne pa ö ne Sosoenën to vapöh kokoman voh en pa ö ne' to soe vamanih pan, o te' varih to nonok ne sih a ma vu taate' hat poë varih, se mët ee. Ivëhpëhkëk, ee to nonok vaveos avoe' e ne pa ma taate' poë varih. E' hikta te' non pan, a ma taate' varoe poë varih, ahik, ee to sosoe pet e ne pan, e' to te' vih e non pa ö no upöm te' se nonok avoe' e ne pa ma taate' poë varih.

O Vahutët Pe Sosoenën O Totoopin

2 ¹E Sosoenën to kiiki non o te' hat, ke eöm varih o te' to kiiki nem o te' poë varih, eöm va'peh to hikta te' me nem ta pusun in a taate' kiiki, suk eöm to kiiki koman hah a nem pa tëëm neöm to kiiki nem o upöm te'. ²E Sosoenën se kiiki a ma taate' po te' varih to nonok ne sih a ma taate' hat, ka nat e no pa taate' kiiki pe' to vih, pare' totoopin. ³Eöm po'? Eöm to te' akuk va e nem manih po upöm te'. Vahvanih, köm kiiki nem a ma taate' po te' varih to nonok ne sih a ma taate' hat, ivëhkëk, eöm koman to nonok e nem pa ma taate' hat poë varih? Eöm kës to koman nem pan, eöm se vaniu këh em po vakmis vëh ne Sosoenën se he' a neöm? Ahik rakah!

⁴E Sosoenën to vih tamoan rakah ke non sih peöm. Vahvapo'nih, köm vaörakuk e nem pe Sosoenën? E' to anoeh rakah e non sih peöm

se panih. Pare! hikta nat non sih pa kiiki oho! a ma taate! hat peöm. Ivëhkëk, eöm to vaörakuk rakah e nem po iu pe!. Eöm to hikta nat pö' nem, ha? E Sosoenën to anoeh e non sih peöm pan, eöm se panih a ma taate! hat peöm. ⁵Ivëhkëk, eöm to para! vatösoe, paröm hikta iu panih nem a ma taate! hat peöm. Manih pa ma taate! poë varih, eöm koman to nonok e nem pa ma hanan nöm se taum koe in o kamis. Ko poen no vahutët apuh pe Sosoenën se tavus, e! se vataare en peöm po vakmis pe!. Manih po poen pamëh ne Sosoenën se kiiki vatoe rakah en pa ma napan kurus. ⁶E Sosoenën se piun suk rakah en pa ma taate! no a papaeh a te! to nonok non. ⁷A ma pah te! to suksuk vakis rakah ne sih a taate! vih, pare iu rakah ee pa hanan vih va pa te! va'peh me Sosoenën manih pa vöön va kin. Ee se kon o ëhnan apuh me a tasun vëh no a mët to hikta antoen non a vahik. E Sosoenën se piun ke raeo o to/to' tamoan. ⁸Ivëhkëk, o upöm te! to kehkeh kë koman hah ne a ma tasun pee manih po oeh. Pare koe ee pa ma tah man ne Sosoenën to vataare voh. Ko vatet vapiun ee pa ma taate! to hikta te! totoopin ne. Ivëh, ne Sosoenën se piun suk a ma taate! hat pee po vakmis pe!. ⁹A punis me o kamis apuh rakah se tavus manih pa napan varih to vavatet ne sih a ma taate! hat. Ka kuru vëh, o Jiu!, me ro te! to hikta te! ne pan ee ro Jiu!, ee va'peh se kon kurus ee pa punis, me o kamis apuh pamëh. ¹⁰Ivëhkëk, e Sosoenën se he! a tasun apuh po te! varih to te! ne sih pa nok a ma taate! vakamö', me a taate! ta, manih po te! varih to nonok ne a ma taate! vih. O Jiu! to kon momoan voh ee pa tasun apuh, ka kuru vëh no te! to hikta te! ne pan ee ro Jiu! se kon varu! ee pa tasun pamëh. ¹¹E Sosoenën to kiiki non sih a taate! pa napan pa paeh a taate!, suk e! to hikta ëh non e retereh to te! ne po kum poanheh. ¹²E! to te! va non manih, a napan varih to hikta te! ne paan in o Vavaasis pe Mosës,^a pare nonok vatëh ne sih a ma taate! hat, a taate! hat koman pee ivëh, se vaho! en pee po vahutët, kee ro ee. Ka napan varih to nat voh ee po Vavaasis pe Mosës, pare nonok ne a ma taate! hat, e Sosoenën se vatet en pa soe vëh to kiun non po Vavaasis pe Mosës, pare! kiiki en pa ma taate! hat po te! poë varih. Ke ee me se ro ee. ¹³O te! varih to vapëpënton akuk ne o Vavaasis pe Mosës, ee to hikta antoen ne a tavus a kën poan e Sosoenën. Ahik. O te! varoe varih to pënton o Vavaasis pe Mosës, pare vatet, ee varoe to antoen ne a tavus a kën poan e Sosoenën. ¹⁴E! to te! va non manih pan, a napan varih to hikta te! ne pan ee ro Jiu!, ee to hikta te! ne paan o Vavaasis pe Mosës, a napan poë varih se keh vavatet rakah ne a ma taneah no a taate! pee to soe non, ee se nat e ne pa taate! hat, me a taate! vih. Manih pa ma

^a **2.12** [... o Vavaasis pe Mosës,] E Sosoenën to he! koe a ma Vavaasis varih pe Mosës manih pa napan va Israël. Ep na po tonun o Puk to te! non a Kölösöri! pa maaka vavih a tah no o Vavaasis pe Mosës to soe non.

kokoman pee e Sosoenën to vaho' en po nat pamëh manih pee. Ee to nat koman e ne pee to te' e ne paan in a taate' koman pee. ¹⁵Manih pa ma kokoman pee, nee to nat e ne pa taate' hat, me a taate' vih. Vamanih pa ö no Vavaasis pe Mosës to soe va non. Ke' a tah pamëh to vataare en pea pa taate' pee. A ma meh poen no a ma kokoman pee se soe ken pee pa taate' nee to nok to hat, ke', a taate' nee to nok, to vih. ¹⁶A ma tah kurus varih se tavus vahik po poen ne Sosoenën se soe ke Ieesu' Kristo, ke' kiiki a ma kokoman vakoaan pa napan. Vamanih pa soe vih pe Sosoenën vëh nö' to sosoe no' se tavus.

A Napan Va Israël To Koman Ne Pan A Taate' Pe Mosës Se Va'aus En Pee

¹⁷Eöm varih o Jiu', eöm to sosoe em sih pan, “Emöm o vute' totoopin rakah pe Sosoenën.” Ivëh, köm koman kës nem pan, o Vavaasis pe Mosës se va'aus en peöm, ha? Ahik rakah. ¹⁸Eöm to nat voh em po Vavaasis pe Mosës, paröm nat e nem pa ma tah ne Sosoenën to iu non, paröm inan e nem pa ma tah a pa'puh, suk o Vavaasis pe Mosës to vaasis a neöm. ¹⁹Eöm varih o Jiu' to koman nem sih pan, eöm to vovoh ke nem o te' kekeho', paröm te' va nem manih po ëman pa napan varih to te' ne sih pa popoen. ²⁰Paröm koman nem pan, eöm se vavaasis a nap papön pa ma taate' vih, kee nat ne nonok ne a ma taate' hat. Paröm antoen e nem pa vavaasis o te' varih no a ma kokoman pee to hikta te' natsean ne. Eöm to te' me nem o Vavaasis pe Mosës, ivëh, köm koman nem pan, eöm to nat e nem pa ma moeh tah kurus me a soe man. ²¹Eöm varih to vavaasis nem sih o upöm te'. Vahvapo'nih, köm hikta vavaasis koman hah a nem? Eöm to sosoe vakis rakah ke nem sih po upöm te', pan ee se nat ne kakaveo ne. Vahvapo'nih, köm kakaveo e nem? ²²Eöm to sosoe pip nem sih o upöm te' pan, ee se nat ne te'te'vaasi' ne. Vahvapo'nih, köm te'te'vaasi' e nem? Eöm to rës e nem pa ma ta nö'nës. Vahvapo'nih, köm kakaveo ta nö'nës e nem pa koman a ma iuun hinhin apuh pa napan to hikta te' ne pan ee ro Jiu'? ²³Eöm to kë koman hah a nem sih, suk eöm to koman nem pan eöm to nat e nem po Vavaasis pe Mosës. Ivëhkëk, a tääm nöm to kök o Vavaasis pamëh, a ma upöm te' se ep a taate' nöm to nok, pare kö ee pe Sosoenën. ²⁴E' to te' man rakah e non, suk o Puk Vapenpen pe Sosoenën to soe non pan,

“O te' varih to hikta te' ne pan ee ro Jiu',
ee se soe o'oah ee pa ëhnan e Sosoenën,
suk a ma taate' peöm o Jiu'.”

Ais 52:5; Ese 36:20

²⁵Eöm se keh vavatet nem o Vavaasis pe Mosës, paröm pe a ma ö kokoaan peöm, a, e' a taate' vih rakah i pamëh. Ivëhkëk, eöm se këh kök o Vavaasis pamëh, e' to ep va e non manih peöm a ken voe nee to hikta pe voh a ma ö kokoaan peöm. ²⁶A ken voe varih to hikta pe voh a ma ö kokoaan pee se keh vavatet ne o Vavaasis pe Mosës, a tasun kës pamëh se

ep va e non manih pee to pe voh ee? ²⁷A ken voe varih to hikta pe voh a ma ö kokoaan pee, ivëhkëk, ee to vavattet vavih ne o Vavaasis pe Mosës, a ken voe poë varih to vataare e ne pan, e Sosoenën to nok a taate' totoopin, pa ö ne' to vateen a neöm o Jiu', suk eöm to kök o Vavaasis pe Mosës. Eöm to vavattet e nem pa taate' va pa pe a ö kokoaan, ivëhkëk, a taate' pamëh hikta se va'aus a no neöm pa vaniu këh o kiiki pe Sosoenën. ²⁸E' to te' man rakah e non, suk e voe se tavus ro en pa to Jiu', e' hikta se te' non pan e' a to Jiu' vamaman. Ivëh, ke voe se keh pe ro en, a tah pamëh hikta soe non pan, e' a to Jiu'. ²⁹Ivëhpëhkëk, a to Jiu' vamaman rakah ivëh, no a ma kokoman pe' to tane' non ma' po kupu pe'. Ivëh, kee se keh pe a ö kokoaan po te', suk a ö nee to vavattet ne a ma kiun va po Vavaasis pe Mosës, a tah pamëh hikta vataare vamaman non pan, ee ro Jiu'. A te' se vatompoan varoe me e Sosoenën pa tääm no a Tuvuh Vasio' pe Sosoenën se pe o kupu pe' vamanih pa ö no a te' to pe a ö kokoaan pe'. A napan hikta se kë ne a te' pamëh, ivëhkëk, e Sosoenën se kë en pe'.

A Taate' Hat To Hikta Onöt Non A Mirö' A Taate' Vih

3 ¹A to Jiu' vamaman ivëh, a te' to vatompoan me e Sosoenën pa tääm no a Tuvuh Vasio' to pe o kupu pe', ke' te' va non manih pa ö no a te' to pe a ö kokoaan pe'. A soe pamëh se keh te' man non, e' se va'aus vah va po' in a te' vëh nih to tavus pa to Jiu'?^b Me a vih taeah po' no a taate' va pa pe a ö kokoaan se va'aus vah va in a te' pamëh? ²E' to te' man rakah e non pe' se va'aus en pa te' pa ma hanan peo. Vamomoaan rakah ne Sosoenën to he' voh a ma soe, kee kiun po Puk Vapenpen pe' pan, ee se matop ne ko he' pet o upöm te'. ³Ko upöm Jiu' se keh hikta vatet totoopin a soe pe Sosoenën, a taate' vatösoe pee onöt kës e non pa panih o kokoman pe Sosoenën pa nok a tah ne' to soe voh? ⁴Ahik rakah, ea to nat e no pe Sosoenën to hikta nat non pa soe o piuk, ivëhkëk, a napan kurus ee o pikpiuk. E' to te' va e non manih pa soe pe Sosoenën nee to kiun voh to soe va non manih pan,

“E' se pah tavus vateera' rakah en,

eën to pah te' vatotoopin suk e nom pa ö tooto va pën.

Ka napan se keh koman ne a vaho' a oah po vahutët,

ee to hikta onöt ne a vöknah a oah.”

Sng 51:4

⁵Ea se po' soe vanih pa ö no a taate' hat pea to vatvus vateera' en pa taate' totoopin pe Sosoenën? Eö' to to va nën, eö' to tooto ke no' pan, o te' tooto pinpiun. Ivëh, ka onöt kës e no pa soe pan, e' to ep vahat e non pa ö ne Sosoenën se vakmis a ra? ⁶Ahik rakah! E Sosoenën se keh hikta onöt non a vakmis a ra, e' me to hikta onöt non a kiiki a napan kurus

^b 3.1 Manih pa taate' po Jiu' e taman se keh vatvus e koa', e koa' pamëh se te' non po vute' pe taman.

varih po oeh. Ivëhkëk, ea to nat e no pe' se kiiki en pa napan kurus varih. ⁷Aeoh, e' to te' akuk va e non manih po kokoman pa te' vëh to soe vamanih pan, “A soe piuk peö' se keh vatvus vateera' in a soe man pe Sosoenën, ka tah pamëh se nok a ëhnan apuh pe Sosoenën ke' tavus va'puh oah en, ivëh, ke' te' vahvapo' non nih ke' popoka' e non peö' a te' nonok hat, ko piun vahat en peö'?” ⁸A soe pamëh se keh te' man non, e' to vih e non pa ö na se soe vamanih, “Ea se nok a taate' hat, ivëh, ka taate' vih se tavus.” E' to te' man e non po upöm te' to soe pan, eö' to soe va nën, ivëh, kee vasosöë me e ne peö'. Ivëhkëk, e' to hikta te' non pan, e' a soe peö'. Po poen ne Sosoenën se kiiki a napan, o kiiki pe' se te' totoopin e non. ⁹Eöm kës to koman nem pan, ea ro Jiu' to vih oah e no po te' varih to hikta te' ne pan ee ro Jiu'? Ahik! Eö' to poka' kurus voh eo' pa napan varih o Jiu' me o te' varih to hikta te' ne pan ee ro Jiu', ea kurus to te' no paan o kakis va pa taate' hat.

¹⁰E' to te' akuk va kov e non manih, pa soe pe Sosoenën vëh nee to kiun voh to soe va non manih pan,

“Ahikta pah te' to te' totoopin non.

Ahik rakah!

¹¹A hikta pah te' to maaka rakah non a taate' totoopin pe Sosoenën.

Ka hikta pah te' to vavaiu non sih e Sosoenën,
marën a kë a ëhnaneah.

¹²A napan kurus to he' tonun voh ee pe Sosoenën,
pare örakuk pa matan e Sosoenën.

Ahikta pah te' to nonok vavih non sih,
Ahik rakah!”

Sng 14:1-3

¹³“A ma rivoere to koa

ko te' uhio' e ne pa kove' te' mët to panan non.

Ka ma meëre to vavatvus ne sih a ma piuk,”

Sng 5:9

“ka ma vaato pee te' hutët e ne po kuru' vamëtmët.”

Sng 140:3

¹⁴“Ee to vapöpöötan ne sih o upöm te',

pare sosoe ne sih a ma tah to vahara' vahat e ne pa napan.”

Sng 10:7

¹⁵“A ma tamoan nee to te' vamatop vavi' e ne pa ip vamët ro upöm te'.

¹⁶A ma tamoan nee to vavih vah ne,
pa mirö' a napan me a he' punis raoe.

¹⁷Pare hikta te' vakamö' me ne o upöm te'.”

Sng 59:7-8

¹⁸“Pare hikta ta ne e Sosoenën,

ko näöp i ne poë.”

Sng 36:1

¹⁹Ivëh, ka nat e no pa ma soe tera' pe Sosoenën varih to soe ne pan, o te' varih to te' ne paan o Vavaasis pe Mosës, ee to hikta onöt ne a vonih a ma taate' hat pee. Ivëh, no a napan kurus varih po oeh avoes se sun suk

po kiiki pe Sosoenën. ²⁰Suk ahikta pah te' to onöt non a vonih manih pa taate' hat pa matan e Sosoenën. Ahik, o Vavaasis pe Mosës to onöt e non pa vataare a ra a ma hat na to nonok no sih.

**A Te' To Vaman Non E Ieesu' Kristo E' A Te'
Vih, Pare' Te' Me Non O Ĕhnan Vih**

²¹Ivëhkëk kuru, e' to tavus vateera' en, e Sosoenën vëh no a taate' pe' a totoopin, to soe vateera' voh en pan, a napan varih to vatompoan vavih me ne poë. Ko vatompoan pamëh hikta se tavus suk non a taate' va pa vatet o Vavaasis pe Mosës. Moaan rakah voh no Vavaasis pe Mosës, me o Vavaasis po Te' Vanënën Soe, to vavaato suk voh e ne pa hanan pamëh. ²²Ko vatompoan pamëh se tane' ma' pa ö no te' varih o Jiu', me ro te' varih to hikta te' ne pan ee ro Jiu' se vaman e Ieesu' Kristo. Suk e Sosoenën to ep kurus e non pa napan to te' va e ne manih pa pah ö. ²³Suk ea kurus rakah a nap nonok hat. Para hikta iu vatet no a taate' pe Sosoenën. ²⁴Ivëhkëk, e Sosoenën to vatompoan rakah me voh en pea manih pa taate' ururuan pe'. E' to antoen e non pa nok ka ra a tah pamëh, suk e' to vanö ma' e Ieesu' Kristo pa voen hah a ra, pare' kon hah a ra manih pa mët pe'. ²⁵E Sosoenën to vataare voh a napan a ö ne Ieesu' se mët vah va vamanih pa tah nee to ës ke na e Sosoenën marën a vahik o heve pe'. E' to nok va nën manih pa napan, pa tëëm nee to vaman ne pan, e Ieesu' to mët suk raoe. E Sosoenën to nok a tah pamëh pa vataare a napan, pan e' a totoopin, suk ataeah, a tëëm vamomoaan voh ne' to tö ke voh a napan, ko hikta vavakmis tiroë' voh non o te' varih to nonok ne a ma taate' hat. ²⁶Kuru e Sosoenën vëh no a taate' pe' a totoopin to soe pan, a napan varih to vatompoan vavih me ne poë, pare vaman ne poë, o vaman pee, me o vatompoan pee, to vataare e non pa napan kurus, pe' a te' totoopin, pa ö ne' to vatompoan me a napan varih to vaman e Ieesu'.

²⁷Ivëh, ke ea ro Jiu' varih to vavattet no sih o Vavaasis pe Mosës, ea onöt kës e no pa kë koman hah a? Ahik rakah! Ahikta tah na se këëkë koman suk hah a no, suk ataeah, e Sosoenën to soe tavus voh en pan, a hikta pah te' to onöt non a vatompoan me eah pa ö ne' se keh vavattet varoe non o Vavaasis pe Mosës. Ivëhkëk, e' to soe varoe pan, a te' se vatompoan me non poan, pa ö ne' se vaman varoe e Ieesu'. ²⁸Ea to soe va nën, suk ea to nat e no pe' to te' man e non, pan o vaman varoe pea ivëh, se vataare a ra a ö na to vatompoan vavih me e no pe Sosoenën. Ka hik manih pa ö na se keh vavattet varoe no o Vavaasis pe Mosës. ²⁹Eöm kës to koman nem pan, e Sosoenën se kon varoe o Jiu', pare' hikta se kon me non o te' varih to hikta te' ne pan ee ro Jiu'? Ahik rakah! E' se kon me en po te' varih to hikta te' ne pan ee ro Jiu'. ³⁰E Sosoenën varoe a paeh to antoen non a vatompoan vatotoopin me ro Jiu' pa ö nee se keh vaman e Ieesu' Kristo, suk e'e' varoe kuru a paeh to te' voh non. Me e'

varoe se vatompoan vatotoopin me ro te' varih to hikta te' ne pan ee ro Jiu', pa ö nee se keh vaman e Ieesu' Kristo. ³¹Eö! kës to onöt e no' pa mirö' o Vavaasis pe Mosës, pa a ö nö' to vavaasis no' pan, e Sosoenën to vatompoan vavih varoe me non sih a napan pa ö nee se keh vaman e Ieesu' Kristo? Ahik rakah! O vavaasis peö' to soe va non manih pan, o Vavaasis pe Mosës o pöh kikis to soe non pan, a napan kurus to teen voh ee pa hat.

Manih Po Epep Pe Sosoenën, E Abraham A Te' Vih Rakah

4 ¹Ivëh, ka nat e no pan, a soe to kiun non po Vavaasis pe Mosës to te' man e non. Ivëh, ka se kokoman vavih rakah pa soe ne sipuura napan va Israël, e Abraham to taum voh, e' a soe man. ²E' se keh te' man non pan e Abraham to nonok voh non a ma taate' vih, ka taate' vih pamëh nok poan ke' tavus en a te' totoopin pa matan e Sosoenën. Ivëh, ke' onöt kës e non pa kë koman hah a ëhnaneah? Ahik rakah! E Sosoenën to hikta koman non pan a tah pamëh to te' man non. ³Ea to nat e no pa pusun in a ö ne Abraham to tavus suk voh a te' totoopin pa matan e Sosoenën, suk ataeah a soe to kiun non po Puk pe Sosoenën to soe non pan,

“E Abraham to vaman voh a soe pe Sosoenën,
ivëh, ke Sosoenën poka' en pe',
a te' totoopin.”

Jen 15:6

⁴A te' to kiu moni' non sih, ko voen pe' hikta te' va non manih pan o he', ahik, o voen pe' to te' va non manih pa tah ne' to kikiu suk non. ⁵Ea to nat va no manih pan, o te' varih to hikta vavitet ne o Vavaasis pe Mosës, ee to teen e ne pa hat. Ivëhkëk, ee to vaman e ne pe Sosoenën vëh to popoka' non sih a napan pan, ee ro te' totoopin. E Sosoenën to ep non o vaman pee, pare' popoka' e non pee o te' totoopin. E Sosoenën to poka' a napan o te' totoopin to te' va non manih, po he' ne' to he' rae. ⁶A Te' Sunön vëh e Devit to soe voh en pa pah tah pa ö ne' to soe pan, a te' to te' me non a tasun vih pa ö ne Sosoenën to ep va in non poan manih pa te' totoopin, e' hikta se vavitet ro non o Vavaasis pe Mosës. E Devit to soe vavoh manih pan,

⁷“Vaeö rakah po te' varih to he' tonun voh o Vavaasis pe Mosës,
ivëhkëk, e Sosoenën to ururuan rae,
pare' ihan anoe voh en pa ma hat pee.

Oman, ee se vaeö rakah,

suk ataeah, e Sosoenën hikta kute' hah non pa ma taate' hat pee.

⁸Vaeö rakah pa te' vëh ne Sosoenën to hikta ep hah va non manih pan,
e' to teen non ta hat pe'.”

Sng 32:1-2

⁹Ivëh, ka tasun vih pö' pamëh to te' suk varoe pö' non a ra o Jiu' pe' a ö na to pe voh a ö kokoaan va pa sioniira? Ke' a tasun vih pö' pamëh

to te' suk varoe pö' non o te' varih to hikta te' ne pan ee ro Jiu' varih to hikta pe voh a ö kokoaan va pa sioniire? Ea to nat e no pa soe to kiun non manih po Puk pe Sosoenën to man. A soe pamëh to sosoe suk non e Abraham pan, “E Abraham to vaman voh en pa tah ne Sosoenën to soe ke voh poan, ivëh, ne Sosoenën to ep suk va i non poan manih pa te' totoopin.”

¹⁰Ivëh, ke Abraham nok vahvapo' voh nih, ke Sosoenën poka' poan a te' vih no a taate' pe' to totoopin? E Sosoenën kës to kon vovoh voh poan pa ö ne' to me' avoe' e non pa pe, ke' murin in a ö ne' to pe en pa ö kokoaan pe'? Ahik! E' to kon vovoh voh poan, ke' pah pe po' a ö kokoaan pe'. ¹¹E Abraham to me' avoe' voh e non pa pe a ö kokoaan pe', ke Sosoenën poka' en pe' a te' totoopin. E Sosoenën to he' poan a taate' va pa pe a ö kokoaan to te' va non manih po vëknöm, to vëknöm non poan a te' totoopin suk o vaman pe'. Ivëh, ke' te' va non manih e Abraham e tamëëro te' varih to hikta pe voh, ivëhkëk, ee to vaman e ne pe Sosoenën. E Abraham e' e tamëëra napan varih ne Sosoenën to vatompooan vavih me voh. ¹²E Abraham pet me, e tamëëra napan varih to pe voh, pare vavetet ne a taate' va po vaman vëh, o vaman pamëh ne tamaara Abraham to te' me voh non, momoan voh in a ö ne' to me' avoe' voh e non pa pe a ö kokoaan pe'.

A Soe Man Pe Sosoenën, E' A Soe Pa Napan Varih To Te' Me Ne O Vaman

¹³E' hikta te' non pan, e Abraham to vavetet voh non o Vavaasis pe Mosës, ivëh, ke Sosoenën soe vatökrus voh en pa ö ne' se he' poan, me ra ken supnai' pe' o oeh ovoes. Ahik! Suk ataeah, e Sosoenën to ep varoe non o vaman pe', ivëh, ke' ep va in non poan manih pa te' totoopin. ¹⁴Ivëh, ke' man rakah e non, suk ataeah, o te' varih to vavetet varoe ne sih o Vavaasis pe Mosës se keh onöt e ne pa kon o oeh ovoes, va pa ö ne Sosoenën to soe vaman vavoh. A, a taate' vaman se örakuk en, ko te' hikta onöt ne a kon a tah vëh ne Sosoenën to soe vaman voh pan e' se he'. ¹⁵Ea to nat va e no manih pan, e Sosoenën to heve ov e non pa napan, suk ee to hikta onöt ne a vatet kurus o Vavaasis pe Mosës. Ivëhkëk, o Vavaasis pamëh se keh hikta te' non, a, ka taate' vatösoe hikta se te' me non. ¹⁶Ivëh, ke Sosoenën hikta se he' non a tah ne' to soe vaman ke voh a napan. Suk o te' varih to he' tonun ne o Vavaasis pe Mosës. E' se he' varoe o te' varih to vaman ne poë, kee se kon ee pa tah ne' to soe vaman ke voh rae, suk ataeah, e' to ururuan non rae. Ivëh, ka tah ne' to soe vaman voh vamanih po he', o pus koa' kurus pe Abraham se kon ee. E' hikta te' non pan o Jiu' varoe ivariv to vaman ne, pare vavetet ne o Vavaasis pe Mosës. Ahik! O te' me varih to vaman va ne manih pa ö ne Abraham to vaman vavoh non, ee to hikta te' ne pan ee ro Jiu'. E Abraham to te' va non manih pe tamaara o Jiu' varih to vaman

no, me o te' varih to hikta te' ne pan ee ro Jiu' to vaman ne. ¹⁷Ka soe to kiun non manih po Puk Vapenpen pe Sosoenën to soe non non pan,

“Eö' to nok oah kën tavus eom e tamëëra ma kum te' peo.” *Jen 17:5*

E Abraham to vaman e Sosoenën pa ö ne' to soe a soe va'ih, e Sosoenën vëh to onöt e non pa vato' hah o te' mët, me e' se soe ka ma tah to hikta te' moaan voh ne, kee tavus ee. ¹⁸E Abraham to vaman a soe vaman pe Sosoenën, e' he manot ko hikta onöt non a ö se' vataman ta koa' oete'. Ivëhkëk, e' to anoeh rakah e non pe Sosoenën se vatvus a tah ne' to soe vaman voh ke poan. Ivëh, ke' vataman a ma kum te' peo vamanih pa ö ne Sosoenën to soe vavoh ke poan pan,

“O pus koa' pën se peo.” *Jen 15:5*

¹⁹E Abraham to hikta ponki' voh non po vaman, suk e' to nat e non pe Sosoenën se vakikis en pa sionineah, ke' onöt e non pa vataman ta koa' oete', a sionineah he te' ro va non manih pa te' to mët voh en. E' to onöt non o 100 kirismas, pare' nat pet e non pe köövo pe' Sara' to hikta onöt non a vasinan ta koa', suk ataeah, a komaneah to te' pet va e non manih pa te' to mët voh en. ²⁰Ivëhkëk, e' to hikta panih o kokoman pe', pare' hikta koe a vaman a soe ne Sosoenën to soe vaman voh, ivëhpëhkëk, o vaman pe' to pah te' kikis avoe' nö e non, ke' soe tavus en pan, e Sosoenën a kikis oah rakah. ²¹E Abraham to vaman rakah e non pe Sosoenën to te' me e non po kikis pa nok a tah ne' to soe ke voh poan. ²²Ivëh, ka soe to kiun non manih po Puk pe Sosoenën to soe va non manih pan,

“E Sosoenën to kon en pe Abraham, suk o vaman pe',
ko vaman pamëh vataare e non pe' a te' to vatompoan vavih me
non e Sosoenën.” *Jen 15:6*

²³⁻²⁴Ka soe va'ih to kiun non po Puk pe Sosoenën to soe va non manih pan,

“E Sosoenën to kon en pe Abraham, suk o vaman pe'.” *Jen 15:6*

Ivëhkëk, a soe pamëh to hikta te' suk varoe non e Abraham. Ahik, e' to soe suk pet me e non pea a napan kurus. E Sosoenën se kon me en pea, pa ö ne ea se vaman pet no a te' vëh to kunkuin tane' hah voh e Sunön pea Ieesu' pa nap mët. ²⁵E Sosoenën to vahe' voh e Ieesu', pan e' se mët suk a ma hat pea, pare' sun tane' hah voh pa mët, marën a ö na se vatompoan vavih me e Sosoenën.

E Sosoenën To Poka' A Rora Sih O Te' Totoopin Pa Ö Na Se Te' Me No O Vaman

5 ¹Ivëh, ne Sosoenën to soe suk pan ea to vatompoan vavih me voh e no pe', suk ea to vaman no e Ieesu' Kristo. Ivëh ka kuru, na se vakamö' vavih rakah me Sosoenën. ²Suk a tah ne Ieesu' to nok voh pa va'aus a ra me a ö na to vaman no eah, e' to vataare voh a ra a hanan

va pa ö na se huk vatët ma' pe Sosoenën, suk, e' to ururuan tamooan a rora. Ivëh ka kuru, ea se vaeö suk no a ö na to anoeh rakah me no po vaman, pan a tapui se tane' ma' manuh pa vöön va kin, pa ö no kikis pe Sosoenën to te' non. ³E' to hikta te' non pan a tah varoe pamëh na se vaeö suk no, ahik, ea se vaeö me no a ma punis pea, suk ataeah, ea to nat e no pan, a ma punis poë varih to vavaasis a rora a ö na se sun vakis no, ko te' a ma punis pea. ⁴Ka se keh sun vakis ko te' a ma punis pea, a tah pamëh se vataare va ka ra manih pan, ea varih se vaoah ee pa ma punö'. Ke ea se keh te' va no nën, ea se anoeh rakah me no o vaman pan, ea se kon ee pa tapui. ⁵Ea se anoeh rakah me no o vaman pan, e Sosoenën se vatvus a tah ne' to soe voh ka ra, ivëh, ka hikta se anoeh akuk no. Ea se nat pet no e Sosoenën to koop voh ma' o iu pe' manih pea manih pa ö ne' to vanö voh ma' a Tuvuh Vasio' pe', ke' te' non manih pea.

⁶Ko poen na to hikta te' kikis onöt no a va'aus koman hah a, e Sosoenën to vanö ma' e Ieesu' Kristo pa tääm koman rakah ne' to vaho' voh, marën a ö ne' se mët, pare' kon hah a nap nonok hat. ⁷O man rakah, e' to para' hiva' rakah pa te' se mët suk a te' totoopin. Ivëhkëk, e' to tö pö' e non pa ö no a te' vavaes se keh he' rakah ea pa mët, suk a meh te' vih. ⁸Ivëhkëk, a tääm na to te' avoe' voh e no a nap nonok hat, e Sosoenën to vataare en pea po iu apuh pe' manih pea, pa ö ne' to vanö ma' e Ieesu' Kristo, ke' mët suk en pa ma hat pea.

⁹O era' pe Ieesu' Kristo to tako', pare' hikhiuk en pa ma hat pea. Ke Sosoenën poka' en pea o te' to vatompoan vavih me no eah. Ivëh, ka nat rakah e no pe' se hehe en pea. Ka te' vavih e no po poen ne Sosoenën se vakmis o te' varih to nonok vatëh ne sih a ma taate' hat. ¹⁰Ivëh, ke' te' man e non pan, a tääm avoe' pamëh na to vatösoe voh e no pe Sosoenën, e' to vatompoan vavih hah me voh en pea manih pa mët pe Koa' pe'. Suk a ö na to nat momooan voh ee pa tah pamëh, ea to nat vateera' rakah e no pan, e Sosoenën to vatompoan vavih hah me voh en pea. Suk ataeah, e Koa' pe' to te' to'to' e non kuru, ko se me en pea, ka te' va'peh tamooan me e no pe Sosoenën. ¹¹Ka meh tah, ivëh, e Sunön pea Ieesu' Kristo to va'aus voh a ra ka vatompoan vavih hah me ee pe Sosoenën. Iva'ih, kuru na to vaeö suk me no e Sosoenën.

E Adam To Nok A Hat Ka Mët Tavus, Ke Ieesu'

Mët, Pare' He' A Ra O To'to' Tamooan

¹²Ea to nat e no pan, a pah te' to nok voh a hat manih po oeh, pare' mët voh en. Ivëh, ka mët pamëh pah kopös en pa napan kurus manih po oeh, suk ataeah, a napan kurus to nok voh ee pa hat. ¹³O Vavaasis pe Mosës to me' avoe' e non pa tavus, a hat he te' momooan voh e non manih po oeh vëh. Ivëhkëk, a napan to hikta te' maaka voh ne pa ma hat nee to nonok ne. Ivëh, ke Sosoenën hikta antoen voh non a kiiki a ma

hat no a napan to nonok ne, suk o Vavaasis pamëh to hikta te' voh non. ¹⁴Taneo non ma' po poen ne Adam to nok voh a hat, pare' nö non ma', ko öök non po poen pe Mosës, a napan kurus se mëtmët e ne. Ka te' napan varih to hikta nok voh ta ma hat manih pa kök a taate', vamanih pa ö ne Adam to nok vavoh, a mët pamëh se ip me en po te' poë varih.

E Adam to vëknöm i non e Ieesu', a te' vëh se suk amot ma'. ¹⁵A hat pe Adam, me o ururuan pe Sosoenën to hikta te' va ne pa pah ö. Ahik rakah, a hat pa paeh a te' ro to nok voh a napan kurus, kee mëtmët ne. Ivëhkëk, o kikis va po ururuan pe Sosoenën to oah rakah e non po kikis va pa mët, ko te' e non po te' varih to vaman ne. Ka manih po ururuan pa pah te' vëh, e Ieesu' Kristo ne Sosoenën to vatompoan vavih hah me en po te' varih to vaman ne, ka tah pamëh, e' o he' vih ne' to he' raoe. ¹⁶E' to te' non a poa tah, o he' vih pe Sosoenën, me a hat pe Adam. Ka poa tah poë varih to hikta nonok ne a pah tah kee tatavus ne pea. Ahik, a hat ro ko ne Adam to nok manuh pe Sosoenën, to vateen en pea kurus pa hat, pare' vaho' suk en pea po vahutët. Ivëhkëk, o he' vih pe Sosoenën to te' va non manih pan, e' to ururuan a napan, pare' vatompoan vavih hah me en po te' varih to vaman ne, kee kon ee po to'to' tamoan, ee he nok ro voh ee pa ma taate' hat. ¹⁷A pah te' vëh e Adam to pënton varo voh a soe pe Sosoenën, pare' nok a hat, ka mët pa pah te' pamëh tavus va en manih pa te' apuh, pare' vöknah rakah en pa napan kurus. Ivëhkëk, o ururuan pe Sosoenën, me o he' vih pe' to vöknah en po kikis va pa mët. Ivëh, ka nat vavih e no pan, o te' varih to vaman ne, ee se kon ee po ururuan puh tamoan pe Sosoenën, ke Sosoenën se vatompoan vavih hah me en pee. Ee se kon o to'to' tamoan, ko tavus ee o te' susunön manih pa kiu no a pah te' vëh e Ieesu' Kristo to nok.

¹⁸Ivëh, ka nat e no pan, a pah te' vëh e Adam to pënton varo voh a soe pe Sosoenën, pare' nok a taate' hat. Ka manih pa hat pamëh, ne Sosoenën to vateen suk en pea kurus po vahutët. E' to te' akuk va kov e non manih pa pah te' vëh, e Ieesu', to nok a taate' totoopin, ke Sosoenën ep, pare' poka' en pea o te' varih to vaman e Ieesu', pan ea o te' totoopin ka kon ee po to'to' tamoan. ¹⁹A pah te' vëh e Adam to pënton varo voh a soe pe Sosoenën, pare' nok a taate' hat. Ka manih pa taate' vatösoe pe' ivëh, no a napan kurus to teen suk voh pa hat pamëh. E' to te' akuk me va kov e non manih pan, a pah te' vëh e Ieesu' Kristo to tēnan voh a soe pe Sosoenën. Ka manih pa taate' pënton soe pe', no a nap peo se tavus ee o te' totoopin manih po epep pe Sosoenën.

²⁰E Sosoenën to he' voh o Vavaasis pe Mosës manih pa napan marën a ö nee se nat va ne manih pan, ee to pah nonok vörep e ne sih pa ma taate' hat. Pare pah vatösoe oah nö e ne po Vavaasis pe Mosës. Ivëhpëhkëk, e Sosoenën to pah ururuan oah nö e non pee. ²¹A hat to vatvus voh a taate' va pa mët, pare' te' va e non manih pa te' sunön.

Ivëhkëk, kuru no ururuan pe Sosoenën to tavus, pare' vöknah en pa taate' hat, ko te' va e non manih pa te' sunön. Ka manih pa kiu pe Sunön pea Ieesu' Kristo, ne Sosoenën to ururuan a ra, pare' poka' en pea o te' varih to vaman no eah, pan ea o te' totoopin, ivëh, ka kon ee po to'to' tamoan.

Ea To Mët Va'peh Me Voh E Ieesu'

6 ¹Ivëh, ka se po' soe ataeah? Eöm koman kës nem pan, ea se nonok vaveos avoe' nö e no pa ma taate' hat, suk e Sosoenën se ururuan avoe' nö e non pea, ha? Ahik rakah! ²Ea to te' va no manih pa nap mët, ivëh, ka hikta se te' hah no paan o kikis va pa taate' hat. ³Eöm anoe kës voh em pa ö na to vatös me voh e Ieesu' Kristo manih pa ö nee to pupui a ra? Ka tah pamëh to vataare non a ö na to vatös me eah pa mët pe'. ⁴Manih pa taate' pupui na to vatös me voh ee pa mët pe Ieesu' Kristo, ke Sosoenën pe va'peh me voh en pea manih po vapeepe. Manih po kikis koman pe Tamön ne' to kunkuin tane' hah e Ieesu' Kristo manih pa mët. Ivëh, ka se pët kon ee po to'to' voon, marën a ö na se te' me no a taate' pe Ieesu'.

⁵Ea to nat e no pa ö na to vatös me voh ee pe Ieesu', para mët va ee manih pa ö ne' to mët vavoh. Ivëh, ke' te' akuk va kov e non manih pan, ea se pët sun va'peh hah me ee pe', vamanih pa ö ne' to nok vavoh. ⁶Ea to nat e no, pa taate' hat vamoan pea to mët va'peh me voh en pe Ieesu' Kristo manih pa kuruse. Marën o kikis va pa taate' hat pamëh, to kiu non sih manih pa sioniira se hik. Ivëh, ka hikta onöt no a tavus hah a nap kiu pa taate' hat pamëh. ⁷Suk a te' vëh to mët voh en, e' to hikta onöt non a te' hah paan o kikis va pa taate' hat.

⁸Ea to nat e no, pea se keh mët va'peh me e Ieesu' Kristo, ivëh, ka vaman rakah e no pea se pët te' to'to' me e no pe' kuru, me amot. ⁹Suk ea to nat e no pe Ieesu' Kristo to sun tane' hah voh en ma' pa nap mët, pare' hikta antoen non a mët hah. Ko kikis va pa mët to hikta antoen non a vöknah hah poan. ¹⁰Oman, e Ieesu' to mët voh pa pah tëem ro, marën a vöknah o kikis va pa taate' hat, ivëhkëk, kuru ne' to kon en po to'to' voon. Manih po to'to' voon pamëh, ne' to te' va'peh me e non pe Sosoenën, pare' kë non a ëhnaneah. ¹¹E' to te' akuk me va kov e non manih pan, eöm me se inan vamanih, eöm me to mët këh voh em po kikis va pa taate' hat. Paröm te' to'to' koe ke nem manih pe Ieesu' Kristo, köm vatös me eah marën a kë a ëhnan e Sosoenën.

¹²Ivëh, köm se nat nem vaonöt a taate' hat, ke' matop non a ma sionineöm. Pe' o sionin pamëh se mët en, ivëhkëk, o apen to hikta se mët non. Eöm se keh vaonöt va in eah nën, eöm se pënton em po iu hat pa taate' pamëh. ¹³Koe a he' ta pah ö manih pa sionineöm manih pa taate' hat, marën a nok a ma taate' to hikta te' totoopin ne. Eöm se keh

he' rakah em manih pe Sosoenën, eöm se te' va e nem manih pa napan varih to mët voh, pare sun tane' hah po vapeepe. Paröm koe ke Sosoenën matop non a ma ö kuru va pa sionineöm, köm se vatet po' a ma taate' totoopin. ¹⁴A taate' hat to hikta se te' hah non e sunön peöm, suk ataeah, kuru nöm to hikta te' hah nem paan o matop va po Vavaasis pe Mosës. Ahik, eöm to te' nem paan o matop va po ururuan vih pe Sosoenën.

Ea To Te' Va No Manih O Te' Kiu Pa Taate' Totoopin

¹⁵Ivëh, ke eöm koman kës nem pan, ea se nonok e no pa ma taate' hat, suk ea to te' e no paan o matop va po ururuan vih pe Sosoenën? Ahik. Ea se nat no nonok va no nën, suk ataeah, ea to hikta te' hah no paan o matop va po Vavaasis pe Mosës. ¹⁶Oman rakah! Eöm se keh he' em vamanih pa te' kikiu akuk manih pa meh te', eöm se vavatet nem a soe pe'. Eöm se tavus vaman em o te' kikiu akuk pa te' pamëh. Ka te' pamëh nöm to ta nem eah, e' e susun peöm. Ivëh, köm se nat nem vavatet nem a taate' hat. Pe' a taate' hat pamëh se nok a neöm, köm mët, ko nö ke em pe Sosoenën. Ke' eöm se vatet a taate' mamananat. Ka taate' pamëh se me en peöm manih pa matan e Sosoenën, ke Sosoenën poka' en peöm o te' va pa taate' totoopin. ¹⁷Moaan voh nöm to te' nem o te' kikiu akuk pa taate' hat. Ka taate' hat pamëh to matop e non peöm. Ivëhkëk, e' to vih rakah non manih pe Sosoenën, peöm to vavatet rakah me nem o vaman, pataeah no te' te'te' soe pe Sosoenën to vavaasis voh a neöm. Ko vavaasis pamëh to matop e non peöm. ¹⁸Moaan voh nöm to te' va e nem manih pa te' kikiu akuk manih pa taate' hat. Ivëhkëk, kuru nöm to te' va e nem manih po te' kikiu akuk va pa taate' totoopin.

¹⁹Eö' to nok a soe vapipino' va'ih, suk ataeah, a soe va pa ö nöm to he' a ma pah ö va pa ma sionineöm vamanih po te' kikiu akuk, pa taate' kukusan, me a taate' vatösoe, me a taate' hat, a ma taate' poë varih to pepeo avoe' nö e ne. Kën kea, a ma tah poë varih to hiva' e non pa maaka a pusuneah. Ivëhkëk kuru va'ih, nö' to iu no' pan, eöm se he' a ma pah ö va pa ma sionineöm, kee kiu akuk ne manih pa taate' totoopin, köm sih tavus po' a napan koman pe Sosoenën, paröm tavus em o te' varih to vavatet ne a taate' vivihan. ²⁰Eöm se nok a tah pamëh, suk eöm voh o te' kikiu akuk va pa taate' hat. Eöm to taihan këh voh em pa taate' totoopin pa ö nöm to te' nem o te' kikiu akuk pa taate' hat.

²¹A ma vih taneah nöm to kon voh pa tëem nöm to te' voh nem a nap kikiu akuk va pa taate' hat? A ma tah nöm to kon voh ivariih, ee a ma tah varih to vavapoet a no neöm kuru, me a ö nee to he' mët voh ee peöm.

²²Ivëhkëk kuru va'ih, nöm to taihan këh em ma' pa taate' hat. Paröm tavus em a nap kiu akuk pe Sosoenën. Ivëh, ko voa' vih i ne' iva'ih, eöm to tavus em o te' varih to vavatet nem a taate' vivihan, kokon em po to'to' tamoan. ²³Ivëh, ka vahik in a ma soe peö' to soe va non manih

pan, o voen va pa taate' hat ivëh, a mët. Ivëhkëk, o he' ne Sosoenën to he' akuk ivëh, o to'to' tamoan na to kon manih pe Sunön pea, Ieesu' Kristo.

Kuru Na To Kiu No Pa Taate' Panih

7 ¹Kën kea, eöm kurus to nat vavih rakah e nem po Vavaasis pe Mosës. Ivëh, köm nat e nem po Vavaasis pamëh, to matop e non pa napan kurus. Ivëhkëk, a te' se keh mët, ko Vavaasis pamëh hikta se matop hah non poan. ²Ka soe vapipino' va pe' to te' va non manih pan, e köövo se keh me e voe manot pe', pare' te' va'peh me non poan, ke' onöt rakah këk na po poen ne' se mët. Ivëhkëk, e voe se keh mët këh en pe', e köövo pamëh to antoen e non pa me hah ta meh voe, vamanih pa ö no a taate' va po vaen to soe va non. ³Ivëhkëk, e voe se keh te' to'to' avoe' e non, ke köövo pe' këh poan, pare' me a meh voe, a napan se soe va ee manih pan, e' a köövo te'te'vaasi'. Ivëhkëk, e voe pe köövo pamëh se keh mët, e köövo pamëh to te' taihan e non manih pa taate' vaen, pare' antoen e non pa vaen hah. Ke' se keh vaen hah en, a, e köövo pamëh to hikta kök a taate' va po vaen.

⁴E' to te' akuk va kov e non manih pan, eöm to vatös me voh em pe Ieesu' manih pa sionineah, ka vatös peöm pamëh to ep va non manih pan, a taate' hat vamoan voh peöm, to mët va'peh me voh en pe Ieesu' Kristo manih pa kuruse. Ka taate' hat pamëh to hikta matop hah a no neöm, me o Vavaasis pe Mosës hikta se matop hah a no neöm. Ka kuru, ne eöm to vatös me em pa meh te', ka te' pamëh e' a te' to sun tane' hah pa nap mët. Ivëh, ka kuru ne Sosoenën se kon o ëhnan apuh, suk a ö na to vavatet no a ma taate' totoopin. ⁵Moan voh no a taate' hat to te' voh non manih pea, pare' he' a ra o iu hat, suk o Vavaasis pe Mosës to kunkuin vateera' o iu hat pamëh, ka nonok no a ma taate' hat. Ivëh, ka mët tavus en manih pea. ⁶Ivëhkëk, kuru ea to mët këh ee po Vavaasis pe Mosës, ke' hikta matop hah a rora. Ea to taihan këh voh ee po Vavaasis pamëh to ötöön voh a rora. Ivëh ka kuru, na to kiu suk no a kë a ëhnan e Sosoenën, pa ö na to vavatet no a ma taate' totoopin manih pa taate' voon, no a Tuvuh Vasio' to kunkuin manih pa ma kokoman pea. Para hikta vavatet hah no a taate' va pa kë a ëhnan e Sosoenën, pa ö na to vavatet varoe no o Vavaasis pe Mosës.

A Te' Hat To Mirö' Voh A Ra

⁷Eöm tome' koman nem pan, eö' to sosoe no' pan, a hat me o Vavaasis pe Mosës, ee a pah tah akuk. Ahik! Ivëh, ko Vavaasis se keh hikta te' non marën a va'aus a neö' pa nat a ma taate' hat, eö' se po' nat vah va in a ma taate' hat nih? Ivëhkëk, a soe vaënpan pe Sosoenën to te' e non, kö' nat e no' pa hat ivëh ataeah, pe' o Vavaasis pe Mosës to soe va ka rora manih pan,

“Koe a manin a ma tah pa meh te!”

Eks 20:13,15-17

⁸Ivëhkëk, a taate' hat to te' non manih peö', pare' taum koe a hanan pe' manih pa soe vaënpan pe Sosoenën, pare' vatvus o kokoman hat va pa manin a ma tah pa meh te' manih pa komaneo'. E' se keh hikta te' non ta soe vaënpan pe Sosoenën, a taate' hat to hikta se te' hah me non to kikis. ⁹⁻¹⁰Eö' to hikta nat avoe' voh no' pa soe vaënpan pe Sosoenën, parö' te' to'to' voh e no'. Ivëhkëk, eö' to kon vahik eo' pa soe vaënpan pe Sosoenën, ka taate' hat tavus vakikis, kö' mët eo' manih po apen. A soe vaënpan pe Sosoenën to te' suk voh non a ö ne' se he' a neö' o to'to'. Ivëhkëk, manih peö', ne' to te' en ma' pa mët va po apen. ¹¹Suk ataeah, a taate' hat to vaiu a hanan va pa ö ne' se piuk a neö' pa ö ne' to koe ma' manih pa soe vaënpan pe Sosoenën, marën a ip vamët a neö' manih po apen. ¹²Ivëh, ka nat kurus e no, po Vavaasis pe Mosës to tane' koman voh en ma' manuh pe Sosoenën, pare' vivihan. Ka ma soe vaënpan pe Sosoenën varih pa koman o Vavaasis pe Mosës, ee kurus to vivihan, ko totoopin, pare vih.

¹³E' te' vah va non nih, a soe vaënpan kës pe Sosoenën ivëh, to he' a neo' a mët? Ahik! A taate' hat to tavus manih pa soe vaënpan pamëh, pan a mët peö' se tavus. Ke' a tah pamëh to tavus, pan eö' se inan a taate' hat, e' matan vah va non nih? E Sosoenën to he' voh a soe vaënpan pe' pan, e' se vataare va ka neö' manih pan, a taate' hat, e' a tah a pah hat rakah.

A Hat To Pöm Voh A Ra

¹⁴Ea to nat rakah e no po Vavaasis pe Mosës, e' a tah va po apen to tane' voh en ma' manuh pe Sosoenën. Ivëhkëk, eö' a te' to te' me no' o sionin va po oeh vëh, parö' hikta antoen no' a vatet o iu pe Sosoenën. Suk ataeah, eö' to te' va e no' manih pa te' nohnoh, nee to vavoen, kee voh a taate' hat. Ka taate' hat vaneah e non peö'. ¹⁵Eö' to hikta inan no' pataeah nö' to nonok no', parö' hikta nonok no' ataeah nö' to iu no' a nok. Ivëhkëk, eö' to nonok e no' sih pa ma tah rërës nok peö'. ¹⁶Keö' se keh hikta iu nok no' a ma tah rërës peö' varih nö' to nonok no' sih, a tah pamëh to soe va non manih pan, eö' to vapöh kokoman e no' pan, o Vavaasis pe Mosës to te' vih e non. Suk ataeah, e' to soe non pan, a taate' hat nö' to nonok no', e' a tah nö' se nat no' nok. ¹⁷Ivëh, ke eö' koman to hikta nonok no' sih a ma taate' hat poë varih. Ahik, a taate' hat vëh to te' non manih pa komaneo'. E' ivëh, to ta'ta' a no neo' a nok a ma taate' hat poë varih. ¹⁸Oman, eö' to nat e no' pa hikta vih to te' non pa komaneo', manih po iu hat va pa komaneo', e' to hikta onöt non a nok a taate' vih. Eö' to iu e no' pa nok a ma taate' vih. Ivëhkëk, eö' to hikta nonok no' a ma taate' poë varih. ¹⁹Eö' to kehkeh nok no' sih, a ma taate' vih. Ivëhkëk, eö' to hikta nonok no', ka taate' hat nö' to rërës no' sih a nok, nö' to

nonok e no'. ²⁰Ivëh, ke eö' se keh nok eo' pa ma taate' nö' to rërës no' sih a nok, a, e' to hikta te' non pan, eö' ivëh to nonok no' a ma taate' poë varih. A taate' hat vëh to te' non pa komaneo', ivëh to ta' a neo' kö' nok a ma taate' hat poë varih.

²¹Ivëh, kö' taum eo' pe' to te' man e non, pa tëëm nö' to kehkeh nok no' a taate' vih, ka taate' hat vëh to te' non pa komaneo' to ta'ta' e non peö', pa nok a ma taate' hat poë varih. ²²Manih po kokoman rakah peö', ne eö' to iu rakah e no' pa ma soe vaënpan pe Sosoenën. ²³Ivëhkëk, eö' to inan vamanih pan, e' to te' non o meoh kikis to matop e non pa sionin avoes neo'. O kikis pamëh to hikta vapöh kokoman me non a ma tah varih no kokoman peö' to iu ne a nok, pare' vaho' rakah en peö' paan o matop va po iu hat vëh to te' non pa sionineo'. ²⁴Varenan rakah peö', eteh se hehe a neo', kö' këh o sionin va'ih to se me koe en peö' pa hat vëh, to se ip en peö'? ²⁵Eö' se vavihvih ke na e Sosoenën. Manih pa koren e Sunön pea Ieesu' Kristo, e' se hehe en peö'. Ivëh, ka ma iu vih peö', me a ma kokoman vih peö' to te' e ne paan a ma soe vaënpan pe Sosoenën. Ivëhkëk, o iu hat va pa komaneo' to te' e non paan in o kikis va pa taate' hat vëh to matop non a sionineo', pare' mimirö' a no neo'.

**E Ieesu' Kristo To Mët Pare' Vahik Këh A Ra Pa
Taate' Hat, Pare' He' A Ra A Tuvuh Vasio'**

8 ¹Ivëh, ka kuru no a napan varih to vatös me ne e Ieesu' Kristo, ne Sosoenën hikta se vateen non raoe pa hat. ²Suk ataeah, ea pah pae, ea a ma te' pe Ieesu' Kristo, ko kikis pa Tuvuh Vasio' to he' voh a ra o to'to' voon, pare' hehe a rora manih po kikis va pa taate' hat vëh to he'he' a rora sih a mët. ³O Vavaasis pe Mosës to hikta antoen non a veo ke a taate' hat pea, suk ataeah, o iu va pa sioniira to hikta iu non a vatet o Vavaasis pe Mosës. Ivëhkëk, a tah vëh no Vavaasis pe Mosës to hikta antoen non a nok, ne Sosoenën koman to nok vahik voh en. E Sosoenën to vanö voh ma' e koa' oete' pe', ke' tavus te' vamanih pea a nap nonok hat, ivëhkëk, a hikta hat manih pe'. E koa' pamëh to nö voh ma', pa hehe a ra pa ma taate' hat pea. Ka manih pa sionin e koa' pe' pamëh, ne Sosoenën to vateen en pe' pa taate' hat pea, pare' vahik en po kikis va pa taate' hat vëh, na se voh teen. ⁴E Sosoenën to nok vavoh manih pan, a taate' vih totoopin va po Vavaasis pe Mosës, se tavus manih po to'to' pea. Suk ataeah, ea to hikta suksuk hah no o iu va po sionin. Ahik rakah! Ea to vavatet no sih a taate' voon pa Tuvuh Vasio'. ⁵Pe' a napan varih to suksuk ne sih o iu hat va po sionin, no a ma kokoman pee to iu rakah e ne pa vatet o iu hat va pa komëëre. Ivëhkëk, a napan varih to suksuk ne a taate' voon pa Tuvuh Vasio', no a ma kokoman pee to pet vavi' e ne, pa ma tah no Tuvuh Vasio' to iu non. ⁶Ivëh, ko kokoman pa te' se keh vatet a iu hat va pa komaneah, e' se mët en. Ivëhkëk, o kokoman pe' se keh

te' non manih pa Tuvuh Vasio', a te' pamëh se kon en po to'to' tamoan, me o vakamö' vih manih pe Sosoenën. ⁷Ivëhkëk, o kokoman pa te' se keh pet vavi' non pa vatet a ma taate' hat, e' se vakihat me e non po iu pe Sosoenën. E' to rës e non pa vatet a ma soe vaënpan pe Sosoenën, suk ataeah, e' to hikta antoen non a vatet a ma soe poë varih. ⁸Ko te' varih to vavetet ne sih o iu hat va pa komëëre. Ee to hikta onöt ne a he' vaeö e Sosoenën.

⁹Ivëhkëk, eöm to hikta te' hah nem paan a matop va po iu hat pa komëneöm, eöm to te' e nem paan a matop pa Tuvuh Vasio' pa ö no a Tuvuh pe Sosoenën se keh te' non manih peöm. Ivëhkëk, a te' vëh se keh hikta te' me non a Tuvuh pe Ieesu' Kristo, e' hikta se te' non a te' pe Ieesu' Kristo. ¹⁰A ma taate' hat peöm to se ip vamët ee pa ma sionineöm. Ivëhkëk, e Ieesu' Kristo se keh te' non manih peöm, a ma apeneöm se te' to'to' e ne, suk e Sosoenën to poka' en peöm, o te' no a ma taate' peöm to vih, ko totoopin. ¹¹Ka Tuvuh pe Sosoenën to kunkuin tane' hah voh e Ieesu' Kristo manih pa nap mët se keh te' non manih peöm, a, e' se he' koe en po to'to' va po sionin manih pa Tuvuh Vasio' pe' vëh, to te' non peöm.

¹²Kën poaneo' manih pa ëhnan e Ieesu' Kristo, ea se koe ka Tuvuh Vasio' vovoh ka rora, para nat rakah no te' hah no paan in o matop po iu hat va pa komaara. ¹³Eöm se keh vavetet nem o iu hat va pa komëneöm, eöm se mëtmët em. Ivëhkëk, manih po kikis pa Tuvuh Vasio', eöm se koe em pa ma taate' hat va po sionin, paröm kon em po to'to' tamoan. ¹⁴Suk ataeah, o te' varih no a Tuvuh pe Sosoenën to vovoh ke non rae, ee ro pus koa' pe Sosoenën. ¹⁵A Tuvuh va'ih ne Sosoenën to he' voh, e' to nok a ra, ka hikta se te' hah no o te' kikiu akuk pa taate' naöp. E' to nok a ra, ka tavus ee o pus koa' pe Sosoenën. Ka manih pa Tuvuh pamëh ne' to vataman ka ra, ka okook va no sih manih pan, “Tamön”, “Eën e Tamaneo”. ¹⁶A Tuvuh Vasio' koman ivëh to vava'aus non sih a ma apeera, ka nat vateera' e no sih pan, ea ro pus koa' pe Sosoenën. ¹⁷Ea to te' no o pus koa' pe Sosoenën, ivëh, ka se kon ee pa ma tah ne Sosoenën to vakah ka ra o koa', ke Ieesu' Kristo. Ivëhkëk, kuru ea se te' va'peh rakah me no e Ieesu' pa punis vëh ne' to te' voh, marën a ö na se kon o ëhnan apuh vamanih pa ö ne' to kon vavoh.

Amot Na Se Taum A Iho' Vih Manuh Pa Vöön Va Kin

¹⁸Ivëh, ka amot no ëhnan apuh pamëh se tavus vateera' manih pea. Eö' to koman no' pan, o ëhnan apuh pamëh se apuh oah e non pa ma punis, na to tataum no manih kuru. ¹⁹Suk ataeah, a ma moeh tah kurus varih ne Sosoenën to nok voh, to vavëhö' rakah e ne po poen ne Sosoenën se vatvus vateera' rakah en, petereh ivarih, o pus koa' vamaman pe'. ²⁰⁻²¹A ma moeh tah kurus varih ne Sosoenën to nok voh, ee to tatamirö' e ne

kuru. Ka ma tah poë varih to hikta tatamirö' suk ne o iu koman pee. Ahik. Ee to tatamirö' suk ne o iu pe Sosoenën. Ivëhkëk, e' to te' man e non pan, a ma moeh tah kurus varih ne Sosoenën to nok voh, ee se taihan këh ee pa ö nee to kokoa va ne sih, marën a ö nee se te' taihan ne me o ëhnan apuh vëh, no pus koa' pe Sosoenën to te' me ne.

²²Kuru na to nat vavih e no pa ma moeh tah kurus varih ne Sosoenën to nok voh, kuru nee to hara' avoe' e ne po kamis to vatoe me non po kamis vëh, ne köövo to hara' non sih po poen ne' to kehkeh vahuh non. A ma moeh tah kurus poë varih to tötö suk ne sih o kamis pamëh, nee to hara' ne. ²³Ke' hikta te' non pan, a ma tah varoe poë varih to tötö ne. Ahik, ea me ro te' to tötö e no, ea to kon voh ee pa Tuvuh Vasio'. Ka Tuvuh Vasio' pamëh to te' va e non manih po he' vamomoaan ne Sosoenën to he' a ra. Ivëhkëk, ea me to kakamis e no, para tötö e no, ko anoeh e no po poen ne Sosoenën se panih avoes a ra, ka tavus o pus koa' vamaman pe'. Ko poen pamëh ne' se he' a ra o sionin voon to hikta se te' kökööt va non manih po sionin vëh, na to te' me no po oeh. ²⁴Suk ataeah, e Sosoenën to hehe voh en pea, ka anoeh me no po vaman. Ea se keh ep e no kuru pataeah na to anoeh no, e' to hikta te' non pan, a taate' anoeh vamaman ipamëh. A napan hikta se anoeh ne a tah nee to öt vahik e ne. ²⁵Ivëhkëk, ea se keh anoeh no a tah na to me' avoe' e no pa kon, ea se anoeh e no, me a taate' anoeh.

²⁶A Tuvuh Vasio' me to vava'aus e non sih pea pa ö na to tötö no. Ea to hikta nat no pa hin rakah vamanih pa ö na se hinhin va no. Ivëhkëk, a Tuvuh Vasio' koman to hinhin ka rora sih manuh pe Sosoenën, pare' hinhin vatëh rakah ka rora, me o hahara' to para' ruruvun, na to hikta onöt no a soe vamaaka. ²⁷E Sosoenën to antoen e non pa nat ataeah to te' non pa ma kupu pa napan. Pare' nat e non pataeah no a Tuvuh Vasio' to koman non, suk ataeah, a Tuvuh Vasio' to suksuk non sih o iu pe Sosoenën, po poen ne' to hinhin suk a rora a napan pe Sosoenën.

²⁸Ea to nat e no, pa ma moeh tah kurus ne Sosoenën to nonok non sih, marën a va'aus a napan varih to iu ne poë. A napan poë varih ne' to vaoe suk voh a ö nee se tavus vamanih pa ö ne' to koman vavoh non. ²⁹Suk ataeah, e Sosoenën to nat vovoh voh e non pee, e' he me' avoe' voh e non pa nok o oeh. Pare' vate' en pee, kee te' va i ne manih pe Koa' Oete' pe'. Ivëh, ke koa' pe' e Ieesu' Kristo se tavus va en manih pe koa' vamomoaan pa ma kën kea peo pe'. ³⁰E Sosoenën to te' me voh non o kokoman vëh pan, ee se tavus vamanih pe Koa' pe', ko te' varih ne' to koman voh non se tavus vamanih pe Koa' pe', ne' to vate' pet voh en pee. Ko te' varih ne' to vate' voh, ne' to vatompoan vavih me voh en pee, ko te' poë varih, ne' to he' pet en pee po ëhnan apuh.

Ahikta Pah Tah To Onöt Non A Sunpip O Iu Pe Sosoenën

³¹Ea se po' soe vahvanih pa ma tah ne Sosoenën to nok manih pea? E Sosoenën e vamomhë pea to va'aus en pea. Ivëh, ka te' se keh vakihat

me a rora, e' hikta antoen rakah non a vöknah a ra. ³²Oman rakah! E Sosoenën to hikta amun voh ka ra pe Sunai'eah Ieesu' Kristo, pa mët suk a ra. E' to he' voh en pea pe Sunai'eah, ivëh, ke' se he' akuk rakah en pea pa ma moeh tah kurus. ³³Eteh po' to onöt non a vaho' a ra a napan varih ne Sosoenën to kon hah voh, manih po vahutët? Ahik rakah ta pah te' to antoen non, pe' a ö ne Sosoenën to vatompoan vavih me voh en pea. ³⁴Eteh po' to onöt non a vapoka' a napan pe Sosoenën, kee teen ta hat? Ahik rakah ta pah te' to antoen non, pe' a ö ne Ieesu' Kristo to mët voh en, me e' to sun tane' hah en pa nap mët. Ka varu' vakomanih, ne' to te' me non a tasun kikis manih pa papmatö pe Sosoenën, pare' hinhin va'aus tamoaan ke non pea manih pe Sosoenën. ³⁵Ataeah po' to onöt non a ki këh a ra po iu pe Ieesu', pa ö no a punis se keh tavus a ra, ke', pa ö na se keh taum a kamis, me a ö no napan se kehkeh mirö' a rora, me a ö na se keh taum o maë, me a ö na se keh kökööt no pa ta ohop, me a ö no a ma moeh tah hat se kehkeh mirö' a rora? Ahik rakah! A ma tah kurus poë varih to hikta onöt ne a sunpip a ra po iu pe Ieesu' Kristo. ³⁶Oman! A ma tah varih to tatavus ne pea kuru, no Puk Vapenpen pe Sosoenën to sosoe e non,

“Suk ataeah, emöm to te' e nem a napan pën,^c

ivëh, ka ma poen kurus nee to ipip vamët e ne pemöm.”

“Ee to ep va ka no möm

manih po sipsip varih to vamatap ne a ö nee se ip vamët.” *Sng 44:22*

³⁷Ivëhkëk, manih pa ma punis ro poë varih, ea to vöknah koe rakah voh ee pee manih pe Sosoenën vëh to iu a rora sih. ³⁸⁻³⁹Oman! Eö' to nat rakah e no' pa hikta tah va pa ma tah varih to antoen ne a sunpip ka ra, po iu pe Sosoenën, ka ma tah poë varih, ivarih, a mët, me o to'to', me o ankerö', me a ma moeh ora' hat, me a ma taneah varih to te' ne manih kuru, me a ma meh taneah varih to me' avoe' e ne ma', me a ma moeh vu tah varih to te' me ne o kikis apuh, me a ma taneah to te' ne kin, me a ma taneah to te' ne paan o oeh, me a ma meh taneah manih po oeh avoes. Ee a ma tah kurus poë varih to hikta antoen rakah ne a sunpip ka ra po iu vëh pe Sosoenën, na to kon tane' manih pe Sunön pea e Ieesu' Kristo.

E Pöl To Tamak A Napan Va Israël

9 ¹⁻²Eö' e Pöl, eö' to te' me no' e Ieesu' Kristo, parö' sosoe ke no' peöm po man, eö' to hikta pikpiuk no'. A komaneo' no a Tuvuh Vasio' to matop i non, ko sosoe ke non peö' pan, eö' to hikta pikpiuk no' pa ö nö' to soe tavus vamanih pan, o tamak peö' to para' apuh vörep, parö' te' rakah me no' sih a punis apuh manih po kupu peö'. ³Suk eö' to koman

^c 8.36 [emöm to te' e nem a napan pën,] A vot “pën” to te' suk non e Sosoenën.

rakah no' sih a va'aus a kën poaneo' varih o Jiu'. Parö' koman rakah va no' manih sih pan, eö' se keh ro voh ko varakah e Ieesu' Kristo, parö' va'aus a kën poaneo', pa ö ne' se keh antoen non. Kee vaman e Ieesu' Kristo, pare kon o to'to' tamoan vëh, nö' to te' me no'. ⁴⁻⁵Ee ra napan va Israël ne Sosoenën to poka' voh raoe o pus koa' pe'. Ee to ep voh ee po maaka pe Sosoenën, pare te' me e ne po vatampoan ne Sosoenën to noh me voh raoe. E Sosoenën to he' voh raoe o Vavaasis pe' manih pe Mosës, me a taate' man va pa vasunön eah. E' to he' me raoe a ma soe vaman pe', ee to tavus tane' pa nap apa'puh pee varih, e re Abraham, ke Aësak, ke Jekop. Ke', ee a kën tom poan va po oeh vëh ne Ieesu' Kristo to koa' voh. Ko te' e non e Sosoenën to matop e non pa ma moeh tah kurus. Ka se kë tamoan rakah no a ëhnaneah. Oman!

⁶Eö' to me tatamak in sih a kën poaneo' varih Israël. Suk eö' to nat rakah e no' pa nap peo to tavus voh po vute' pamëh, to hikta te' ne pan, ee ra Israël vamaman. Ivëhkëk, eö' to hikta sosoe no' pan, a soe pe Sosoenën to oah akuk. Ahik! ⁷A ma pah te' ro va po vute' va Israël ivarih ne Abraham to vataman voh, to te' va ne manih o pus koa' vamaman pe Abraham. Suk ataeah, e Sosoenën to soe ke voh e Abraham pan,
 “O vute' nö' to soe voh ka oah, se tane' ma' manuh pe Aësak.”

Jen 21:12

⁸Ka tah pamëh to matan va non manih pan, e' to hikta te' non pan, o vute' kurus pe Abraham se te' ne o pus koa' vamaman pe Sosoenën. Ahik, o pus koa' vamaman rakah pe Abraham ivarih o pus koa' pe Sosoenën, suk a soe vaman ne Sosoenën to nok voh manih pe Abraham. ⁹A soe ne Sosoenën to nok ke voh e Abraham ivëh,

“Po poen koman nö' to vaho', nö' se hah ma',
 ke Sara' se kon a koa' oete!”

Jen 18:10,14

¹⁰Ke' hikta te' non pan, a soe varoe pamëh, e Rebëka' to vahuh a poa koa' puna'. Ka poa koa' poë varih to tavus pa pah tamëëre vëh e Aësak, e tamaara. ¹¹⁻¹²Po poen no a poa koa' puna' to me' avoe' voh e ne pa tavus, ka hikta paeh va pee to nok avoe' non ta tah vih, ke', ta tah hat, ke Sosoenën soe ke voh en pe Rebëka' pan,

“A te' a tavus vamomoan, se kiu akuk ke non a te' a tavus suksuk.”

Jen 25:23

E Sosoenën to koman vavoh manih pan, e' se vate' ta paeh va pee, ivëh, ne' to soe suk vavoh nën, marën o kokoman pe' se tavus vaman. Ivëhkëk, e' to hikta iu voh non o kokoman pe' se tavus vaman suk varoe a ma taneah, no a poa koa' to nok. Ahik. E' to iu voh non o kokoman pe' se tavus vaman suk a ö ne e' koman se vate' ta paeh va pee. ¹³Ivëh, ka soe pe Sosoenën to te' non manih po komön o Puk Vapenpen to soe non pan,

“Eö' to iu no' e Jekop,
 ivëhkëk eö' to rës e no' pe Iso!”

Mal 1:2-3

14Ivëh, ka se po' soe vah vanih pa tah pamëh? E' kës to ep vahat pa ö ne Sosoenën to iu varoe non a paeh va pee? Ahik rakah! 15Suk ataeah, e Sosoenën to soe ke voh e Mosës pan,

“Eö' se uruan eo' peteh nö' to koman no',
parö' kamö' eo' peteh nö' to koman no'.”

Eks 33:19

16Ivëh, ke Sosoenën se vate' a te' vëh ne' to iu non pa vataare o ururuan pe'. O iu pe' to hikta han non pataeah no a napan to iu ne, pare punö' ne pa nok. 17Pe' a soe to te' non po Puk Vapenpen, ne Sosoenën to soe ke a te' sunön va Isip pan,

“Eö' to vasunön voh a oah, marën a ö nö' se vataare o kikis peö'
manih pën,
suk a ö no a ëhnaneo' se tavus po oeh avoes.”

Eks 9:16

18Ivëh, ke Sosoenën se uruan en peteh ne' to koman non, pare' vavösvös koman en pe retereh ne' to koman non.

19Ivëh, ka paeh peöm se keh hi a neo' pan, “Suk ataeah po', ne Sosoenën to vateen suk a ra pa ma taate' hat pea? Ahik rakah ta pah te' to onöt non a kök o iu pe Sosoenën.” 20Eën a te' va po oeh vëh. Ka te' akuk va po oeh vëh to hikta te' non ta soe vaonöt pa hi e Sosoenën. Ahikta tah to antoen non a hi a te' vëh to nok poan pan, “Eën nok suk va ka neo' manih ataeah?” 21A te' nonok nöh to antoen rakah e non pa nok a ma taneah ne' to koman non a nok. E' to onöt e non pa nok a poa nöh manih po pöh manean, a paeh, e' a nöh vih marën a nöhnöh varoe pa ma poen apa'puh, ka meh, e' a nöh akuk marën a nöhnöh pa ma poen kurus.

22E Sosoenën me to antoen e non pa nok va nën. E' to kehkeh vataare non o heve pe', me o kikis pe', manih pa napan. Ivëhkëk, e' to te' me voh non a taate' anoeh manih po te' varih ne' to heve ov i non rae. A napan poë varih to anoeh ro ko ne a ö ne Sosoenën se tek rae. 23E Sosoenën to iu vamaaka e non po kikis apuh pe', ne' to koep kunah voh ma' manih pea o te' varih to kon voh o ururuan pe'. E' to vamatop a ra a napan poë varih to anoeh ro no, a ö ne' se he' a ra o kikis apuh pe'. 24Ke ea ivarih a napan varih ne Sosoenën to vate' voh. E' to hikta vate' varoe voh a möm, suk emöm ro Jiu!, ahik, e' to vate' me voh en peöm, o te' to hikta te' nem pan eöm ro Jiu!. 25Manih po Puk pa te' vanënën soe vëh, e Hosea' ne Sosoenën to soe vavoh manih pan,

“Eö' se soe va eo' manih pan, 'Eöm a napan peö',
manih po te' varih, 'to hikta te' voh ne pan ee a napan peö'.
Ko te' varih nö' to hikta iu voh no',
nö' se vataare eo' pee, po iu peö'.”

Hos 2:1,23

26 “Ka manih totoopin rakah pa ma ö nö' to soe ke voh raeo pan,
'Eöm to hikta te' nem pan eöm a napan peö',
Amot nee se poka' ee pee, 'O pus koa' pe Sosoenën a to'to'
tamoaan.’ ”

Hos 1:10

27E Aisaäa', to koman voh non a napan va Israël, pare' soe vamanih pan,
 “A napan va Israël to peo
 va e nee manih po kösan va sinten tahi'.

Ivëhkëk, a nap keok akuk ivarih
 ne Sosoenën se kon hah.

28 Suk ataeah, e Sunön se vakmis vëhö' rakah en pa napan va po oeh
 vëh.”

Ais 10:22-23

29A ma tah kurus to tavoh va ee manih pa ö ne Aisaäa' to soe vavoh,
 “E Sunön A Kikis Vi,
 se keh hikta hehe voh a si' nap keok akuk manih po vute' pea,
 ea se voh tatek kurus rakah vavoh ee manih pa ö no a poa vöön
 varih,
 Södom me Gomora' to tatek vavoh.”

Ais 1:9

A Napan Va Israël To Kiu Vëhva' Suk Voh Ee Pa Kon a Taate' Vih

30 Ivëh, ka ma vavaasis peö' sosoe po' ka rora ataeah? A napan varih
 to hikta te' ne pan ee ro Jiu', ee to hikta pupunö' vakis rakah voh ne pa
 vatompoan vavih me e Sosoenën. Ivëhkëk, e Sosoenën to vatompoan
 vavih me raoe, suk o vaman pee. 31 Ivëhkëk, a napan va Israël varih to
 pupunö' vakis voh ne pa vatet a ma taate' varih to vataare ne a hanan,
 ne Sosoenën to vatompoan vavih me non sih a te'. Ivëhkëk, ee to hikta
 antoen voh ne a vatet vahik vavih rakah a ma taate' poë varih. 32 Suk
 ataeah, ee to hikta vatet a ma taate' poë varih me o vaman. Ee to koman
 vapiun ne pan a kiu hiva' vëh, nee to nonok ne pa vatet a ma taate'
 poë varih se nok raoe kee vatompoan vavih me ee pe Sosoenën. A vös
 vavahan te' to vahan a ma moeere, kee ku' ee. 33 E' to te' akuk va kov
 e non manih pa ö ne Aisaäa' to kiun vavoh manih po Puk pe Sosoenën,
 pare' soe pan,

“Ep öm, eö' to vaho' voh a vös manih Saëon.

Ka vös pamëh to vavahan non sih a napan,
 kee ku'ku' ne.

Ivëhkëk, eteh to vaman non poan, e' hikta se hara' vahat non.”

Ais 8:14; 28:16

A Napan Va Israël To Hikta Nat Ne Pa Taate' Pe Sosoenën

10 1 Kën poaneo', manih pa ëhnan e Ieesu', a tah nö' to iu oah rakah
 no' iva'ih pan, e Sosoenën se kon hah o Jiu'. E' a hin rakah sih
 peö' manih pe Sosoenën. 2 Eö' se soe va keo' peöm manih, suk a taate'
 po Jiu', ee to iu rakah e ne pa vatet a taate' pe Sosoenën. Ivëhkëk, ee to
 hikta nat ne pa ö see vatet vah va in a taate' pamëh. 3 Ee to hikta nat
 ne pa ö ne Sosoenën to vatompoan vavih vah me va i non a napan. Ee
 to pupunö' rakah e ne pa vatompoan vavih me e Sosoenën, suk a ma

kokoman koman pee. Ivëh. kee hikta iu vatet ne o iu pe Sosoenën manih pa vatompoan vavih me poë. ⁴Ea to nat vavih e no pe Ieesu' Kristo to no ma', marën vahik o Vavaasis pe Mosës. Ivëh, ka napan varih to vaman ne poë se vatompoan vavih me po' e Sosoenën.

⁵E Mosës to kiun a soe va po Vavaasis pe Sosoenën ne' to he' moaan voh poan, pan a napan se suksuk ne, ke Sosoenën se vatompoan vavih me po' raoe. E' to soe voh pan,

“A te' vëh to vavatet non o Vavaasis peö', nö' to he' moaan voh e Mosës,

e' se te' to'to' e non.”

Lev 18:5

⁶Ivëhkëk, e' iva'ih a tah no a ma kiun va po Puk pe Sosoenën to vaato suk non a ö no a te' se vatompoan vavih me e Sosoenën, po poen ne' to vaman, a ma kiun poë varih to soe ne pan,

“Eën se nat nom soe pan,

‘Eteh se peah manuh pa vöön va kin?’ ”

Lo 30:13

Eöm se keh vapöh kokoman me nem a soe pamëh, e' to te' akuk va kov e non manih pa ö nöm to soe vamanih pan, “Ea to iu no ta te' se nö manuh pa vöön va kin, ko me kunah ma' e Kristo manih po oeh”.

⁷Paröm nat nem koman pet va nem manih pan,

“Eteh to onöt non a kunah manuh pa vöön pa nap mët?”

Lo 30:13

Eöm se keh vapöh kokoman me nem a soe pamëh, e' to te' akuk va kov e non manih pa ö nöm to soe vamanih pan, “Ea to iu no ta te' se nö manuh pa vöön pa nap mët, ko me peah hah ma' e Kristo.” ⁸Ivëhkëk e' to hikta te' non pan, e' a ö no a te' se vatompoan vavih me e Sosoenën, suk ataeah, a ma kiun va po Puk pe Sosoenën to soe va ne manih pan,

“A soe pamëh to te' vatët rakah e non manih peöm,

e' to te' e non manih pa ma rivoeneöm,

me manih pa ma kupu peöm.”

Lo 30:14

Ka soe pamëh, e' o vavaasis va po vaman möm to vavaasis nem sih. ⁹Eöm se keh popoka' nem e Ieesu' e Sunön pa ma rivoeneöm, me eöm se keh vaman nem e Sosoenën to kunkuin tane' hah e Ieesu' manih pa nap mët, eöm se kon em po to'to' tamoan. ¹⁰Ea to vaman no sih e Sosoenën pa ma kupu pea, ivëh, ke Sosoenën vatompoan vavih me en pea. Ka sosoe tavus no o vaman pamëh pa rivoora, ivëh, ke Sosoenën sih kon hah en pea.

¹¹Ka tah pamëh to te' man e non, suk a ma kiun va po Puk pe Sosoenën to soe va non nën,

“Ketehe to vaman non poan, e' hikta se hara' vahat non eah.” *Ais 28:16*

¹²Suk ataeah, o Jiu' me ra napan varih to hikta te' ne pan ee ro Jiu', ee to vatoe e ne manih po kokoman pe Sosoenën. A paeh a Sunön e' e Sunön pea kurus. Pare' he'he' non sih a ma tapui peo rakah po te' varih to hinhin ne sih poë, pan e' se va'aus raoe. ¹³Suk ataeah, o kiun to te' non po Puk pe Sosoenën to soe avoe' va e non manih pan,

“Eteh to vaoe a ëhnan e Sunön, e Sunön se hehe en pe’.” *Jol 2:32*

¹⁴Ivëhkëk, ee se keh hikta vaman ne poë, ee se po' hin vah va in poë o va'aus nih? Me a ö nee se keh hikta tënan a soe pe', ee se po' vaman vah va in poë nih? Me a ö ne' se keh hikta te' non ta te' se vatvus a soe manih pee, ee se po' tënan vah va in poë nih? ¹⁵Ka napan se keh hikta vanö ma' o te' varih se vatvus a soe, o te' poë varih se po' vatvus vah va in a soe nih? O Puk pe Sosoenën to soe non pan,

“E' to para' vih, pa ö no a napan to te' ma' a Soe Vih pe Sosoenën.”

Ais 52:7

¹⁶Ivëhkëk, e' to hikta te' non pan, a napan kurus va Israël ivarih to vaman voh a Soe Vih pe Sosoenën. A te' vanënën soe vëh e Aisaëa' to soe voh pan,

“Sunön, etereh to pënton voh,^d pare vaman ee pa soe nö' to soe ke voh raoe?”

Ais 53:1

¹⁷Ea to nat e no, pea to tënan a Soe Vih pe Sosoenën, ka Soe pamëh kunkuin en po vaman pea. Ka Soe Vih pamëh to vavaato suk non e Ieesu' Kristo.

¹⁸Eö' to te' no' a hi nö' to kehkeh hi no', to hi va non manih pan, “O Jiu' to pënton kës voh ee pa Soe Vih pe Sosoenën, ha?” A, ea to nat e no pee to pënton voh ee pa Soe Vih pamëh, suk a ma kiun va po Puk Vapenpen to soe va ne manih pan,

“A napan kurus va po oeh to pënton voh ee pa soe pee, ka napan va pa ma vöön kurus tënan voh ee pa ma soe poë varih.”

Sng 19:4

¹⁹Eö' to te' me no' a meh hi nö' to kehkeh hi no', to hi va non manih pan, “A napan va Israël nat vavih kës voh e ne pa pusun in a Soe Vih pamëh, ha?” A, ee to nat vavih voh ee. Vamomoaan nöm se koman hah a soe ne Mosës to soe voh pan,

“Eö' se kon o vute' to hikta te' me ne to ëhnan, marën a vapuhio' a neöm, ö' se vate' o vute' to hikta te' me ne to nat vih, marën a vaheve a neöm.”

Lo 32:21

²⁰Ka te' vanënën soe vëh e Aisaëa' to hikta nanaöp voh non, e' he vatvus va in a soe pe Sosoenën manih pan,

“O te' varih to inan voh a neo', ee o te' poë varih, to hikta hinhin voh a no neo' o va'aus.

Eö' se vataare koman ö' po te' varih to hikta koman ne a ep ka neö'.”

Ais 65:1

²¹Ivëhkëk, a te' vanënën soe vëh e Aisaëa' to kokoman voh non a napan va Israël, pare' vatvus va in a soe pe Sosoenën manih pan,

^d 10.16 [... etereh to pënton voh, ...?] Ka piun, iva'ih, a hikta te' to pënton.

“A ma poen kurus nö' to va'na' no',
 parö' sun vamatop no' pa kon hah a napan varih o vatösoe,
 ivëhkëk, ee to hikta iu tēnan ne a ma soe peö'.” *Ais 65:2*

E Sosoenēn To Ururuan A Napan Kurus

11 ¹Ivëh, kö' se hi va eo' manih pan, “E Sosoenēn kēs to vanun voh en pa napan pe'?” Ahik, e' to hikta vanun raoe, suk ataeah, eö' koman a te' va Israēl to tane' ma' po vute' vëh ne Abraham to vasipun i non sih. Keö' a te' va po vute' pe Bēnjamin. ²⁻³Moaan voh e Sosoenēn to vate' voh en pa napan va Israēl, kee tavus ee a napan pe'. E' to hikta he' tonun avoe' voh non raoe. Eöm to hikta nat pö' nem po vahutët voh pa te' vanēnēn soe vëh e Elaēja', to kiun non po Puk pe Sosoenēn? E Elaēja' to hinhin voh non manih pe Sosoenēn, pan e' se vaho' a napan va Israēl po vahutët, pare' sosoe va non manih pan,

“Sunön, ee to ip vamët voh ee pa te' vanēnēn soe pën.

Pare mirö' me ee pa ma pok vapenpen pën.

Eö' ro ko a pah te' vanēnēn soe to te' no',

ka kuru nee to kehkeh ip vamët pet me e ne peö'.” *1 Kin 19:10,14*

⁴Ivëhkëk, a piun taeah po' ne Sosoenēn to soe ke Elaēja'? E Sosoenēn to soe voh ke poan pan,

“Eö' to te' avoe' me e no' pa 7,000 te' peö' manuh Israēl,
 a napan poë varih to hikta vatokon,

ko vapeo' pasun ke voh e sunön vapikpiuk vëh e Bal.” *1 Kin 19:18*

⁵Kuru, ne' to vatoe e non, e' to hikta te' non pan, a napan kurus va Israēl ivariv to he' tonun e Sosoenēn. Ahik, e' to ururuan voh a si' nap keok akuk va pa napan poë varih, pare' vate' en pee a napan pe'. ⁶E' to hikta koman non a kiu me a ma tah nee to nonok ne. E' to vate' raoe, suk e' to uruan raoe. Ee se keh nok a ma kiu, ke Sosoenēn vate' raoe, ka tah vëh na to popoka' no o ururuan, e' to hikta te' non pan o ururuan vamaman.

⁷Ivëh, ka se po' soe vanih? E' to te' va non manih, a napan va Israēl to kehkeh vatompoan vavih me ne e Sosoenēn. Ivëhkëk, ee to hikta vatompoan vavih me ne poë, suk e Sosoenēn to vavösvös kokoman e non pee, kee hikta iu pēnton ne a soe pe'. Ivëhkëk, a si' nap keok akuk va Israēl ne Sosoenēn to vate' voh, kee vatompoan vavih me ne poë. ⁸Ivëh, no Puk pe Sosoenēn to vavaato suk non a nap vatösoe poë varih, pare' sosoe va non manih pan,

“E Sosoenēn to nok a napan poë varih,

kee te' va e ne manih pa te' to koroh varo.

Ais 29:10

E' to nok raoe, kee hikta onöt ne a inan a ma tah,

nee to ep pa matëëre,

me a ö nee to hikta onöt ne a kon a ma tah

nee to pënton pa ma tenëëre.

Ee to te' avoe! va e ne nën kuru.”

Lo 29:4

⁹Ke! te' akuk va kov e non manih pa ö ne King Devit to soe vavoh manih po Puk Vaëhëh,

“Sunön, eö! to iu no' pan, eën se nok a ma taëën peo me a ma moeh tah vihvih pee,
kee tavus vamanih pa kë me o vasu!,
kee sih vaon raeo,
marën a ö nën se tek raeo.”

¹⁰“Sunön, eö! to iu no' pan, eën se vapopoen a ma matëëre,
kee hikta antoen ne a maaka in a ma kokoman pën.

Sunön, eö! to iu no' pan, eën se vatarom tonun raeo,
pa te' a ma kokoman punis pee,

vamanih pa ö no te' kikiu akuk to te' va ne.”

Sng 69:22-23

E Sosoenën To Kon Hah O Te' Varih To Hikta Te' Ne Pan Ee Ro Jiu'

¹¹Ivëh, kö' se hi va eo' manih pan, “A napan va Israël kës to ku' voh, ka ku' pamëh tek vahik rakah en pee, pa tëëm nee to koman vapiun voh ne a ö nee se vatompoan vavih me e Sosoenën, ha?” Ahik, o kokoman pamëh to nok e Sosoenën, ke' kon hah o te' varih to hikta te' ne pan ee ro Jiu'. E! to nok a hanan pamëh, pan a napan va Israël se ep ko puhio' a tah ne! to nok manih pa napan poë varih. ¹²A tëëm no a napan va Israël to ku' voh, pare he' tonun in poë, pa tëëm nee to hikta vaman ne pan, e Sosoenën to tapui vörep rakah en pa napan kurus va po oeh vëh. Ka ku' pee to vatvus a tapui apuh manih pa napan varih to hikta te' ne pan ee ro Jiu'. Ivëh, ka tëëm no a napan va Israël se keh tarih hah ke ma' manih pe Sosoenën, a, ea to nat e no pe Sosoenën se tapui vörep oah rakah en pa napan kurus va po oeh vëh.

¹³Kuru nö! to kehkeh soe ka no' neöm a napan varih to hikta te' nem pan eöm ro Jiu'. Ke eö! Eö! a aposol peöm, eöm a napan varih to hikta te' nem pan eöm ro Jiu'. Ivëh, kö' se nok rakah a kiu peö' vamanih po aposol, suk e Sosoenën to he' voh a neo' a kiu pamëh. ¹⁴Suk ataeah, eö! to kehkeh kunkuin no' o kokoman pa napan peö' varih o Jiu', pan ee se puhio' a taate' vëh ne Sosoenën to nok manih peöm, pa ö ne! to vatompoan vavih me a neöm. A taate' pamëh nö! to nonok no', marën a ö nö! se rëh hah ma' ta ma meh pee, kee hah ke ma' manih pe Sosoenën. ¹⁵Suk e! to te' man rakah e non pe Sosoenën to he' tonun voh a napan va Israël, pare! vatompoan me en pa napan varih to hikta te' ne pan ee ro Jiu', ivëh, ka tëëm ne! to vatös hah me a napan va Israël, e! to vatoe rakah va e non manih pan, ee to sun tane' hah manih pa nap mët.

¹⁶E! to te' non a soe vapipino' to soe non pan, a ma aan naon se keh te' vih ne, ke Sosoenën vaneah non raeo, ka ma pean me se tavus vavih

ee, ke Sosoenën vaneah me e non pee. Moaan voh e Abraham me ra kën sipuiro Jiu' to te' voh e ne a napan pe Sosoenën. Ke' te' va e non manih, amot me, no kën supnai' pee se tavus amot ee a napan pe Sosoenën. ¹⁷E' to ep rakah ke non pan, a ma pöh pea öliv to takök voh ee. Ee to vëknöm ne a napan va Israë. Ke eöm a napan varih to hikta te' nem pan eöm ro Jiu', eöm to te' va e nem manih po veoh in o öliv poa, nee to vatös me o öliv vëh to tavus momoan voh. Ka kuru vëh nöm to pëtpët kon e nem po kikis me a taëen manih po naon vamomoan pamëh, ko naon vamomoan pamëh ivarih o Jiu'. ¹⁸Ivëh, kôm se nat nem koman nem pan, eöm to vih oah e nem pa ma pea naon varih to takök voh. Eöm se keh te' me nem o kokoman pamëh, eöm se nat va nem manih pan, eöm to hikta vava'aus nem o aan, ahik, o aan to vava'aus a non neöm.

¹⁹Ivëh, kôm se po' soe va em manih pan, "A ma pea naon to takök voh, marën a ö nöl' se vatös hah raoe po rumun." ²⁰Oman, e Sosoenën to nok vavoh en nën. Ivëhkëk, a ma pea öliv varih to takök voh, suk ee to hikta vaman ne, ke eöm te' avoe' e nem a ö va po naon pamëh, suk a ö nöm to vaman nem. Eöm se nat nem këekë koman hah a nem, paröm nanaöp varoe nem, ko matop vavih nem o vaman peöm. ²¹Ea to nat e no pe Sosoenën to moes vi voh en pa ma pea naon totoopin va po naon pamëh, suk ee to hikta vaman voh ne, ivëh, ke' hikta onöt non a vaonöt a neöm, pan eöm se te' va nem manih pa ma pean in o naon pamëh, pa ö nöm se keh hikta vaman nem. ²²Pënton öm! E Sosoenën to para' vih, ivëhkëk, a ma taate' me pe' to para' hiva'. E' se vakmis en po te' varih to hikta iu vatet ne a soe pe'. Ivëhkëk, e' se vih ke non peöm, pö nöm se keh vavetet vakis nem a taate' vih pe'. Eöm se keh hikta vavetet nem a ma taate' vih pe', e' se moes vi këh en peöm po naon vamomoan. ²³Ka napan va Israë se keh vaman hah ee pe Sosoenën, e' to antoen rakah e non pa kon hah raoe, ko vatös hah en pee pa ö ne' to moes kurus tane' voh raoe. ²⁴E' hikta te' va non pa ö na to koman va no sih pan, o pea naon poa se tavus vamanih pa meh ö va po naon vih. Ke eöm o te' varih to hikta te' nem pan eöm ro Jiu', eöm to te' va e nem manih po pea naon nee to moes tane' po öliv poa, pare vatös me o öliv vih. Ivëhkëk, pe' o Jiu' poë varih to te' va e ne po pea öliv to pu tane' ma' po naon vih, ke Sosoenën to antoen rakah e non pa vatös hah raoe manih po naon koman moaan voh pee.

E Sosoenën Se Kon Hah A Napan Kurus Va Israë

²⁵Kën poane' va po vaman, manih pa ehnan e leesu', eö' to iu a nöl' neöm se maaka vavih vamanih pan, eöm to hikta nat vahik nem pa ma tah kurus. A tah vëh nöm to me' avoe' e nem pa nat vahik to te' va non manih pan, e Sosoenën to vavösvös kokoman voh a napan va Israë pa si' tëem kököt akuk. Ivëhkëk, a vatösöe pee se hik en pa tëem no a ma pöh

te' varih to hikta te' ne pan ee ro Jiu' ne Sosoenën to vate' voh, se vaman, pare kon o to'to' tamoaan. ²⁶E' a ö ne Sosoenën se kon koe hah a napan va Israël. E' to kiun va non manih po Puk pe Sosoenën pan,

“A te' vëh se hehe hah a napan
se tane' ma' manih Saëon.

E' se nö ma' pa kon këh o vute' pe Jekop pa hat.

²⁷Ko poen pamëh nö' se nok o vatompoan peö'
me a napan poë varih,
pa tëëm nö' se kon ke a ma hat pee.”

Ais 59:20-21; 27:9

²⁸Ivëhkëk kuru no a napan va Israël to he' tonun avoe' e ne pa soe vih pe Ieesu' Kristo. Ke Sosoenën heve ov e non pee. A taate' pamëh to tavus marën a va'aus a neöm a napan to hikta te' nem pan eöm ro Jiu'. Ivëhkëk, a napan va Israël to te' avoe' e ne a napan pe Sosoenën varih ne' to iu suntan non sih raeo, suk a ma soe vaman ne' to nok ke voh a kën sipuiire.

²⁹E Sosoenën to hikta nat non sih pa panih o kokoman pe' manih pa napan ne' to vate',^e me a ma he' ne' to he' marën a va'aus raeo.

³⁰Moaan voh eöm varih a napan to hikta te' nem pan eöm ro Jiu', eöm to hikta iu pënton voh nem e Sosoenën. Ivëhkëk kuru, nöm to kon em po ururuan, suk a napan varih o Jiu' to hikta iu pënton voh ne. ³¹Ivëh, ka kuru a napan varih o Jiu' to hikta iu pënton ne a soe pe Sosoenën, suk ataeah, e Sosoenën to he' voh o ururuan pe' manih peöm. Ivëhkëk, a tah pamëh to tavus voh, marën a ö nee se kon pet o ururuan manih pe'. ³²E Sosoenën to vaonöt ken pa napan kurus va po oeh vëh pa nok a ma taate' vatösoe, marën a ö ne' se vataare o ururuan pe' manih pee.

Ea Se Kë A Èhnan E Sosoenën

³³Oman! E Sosoenën e tövaneah pa ma moeh tah kurus, ko kokoman me o nat vih pe' to para' ruruvun vörep. Ahikta pah te' to nat varuruvun rakah non a ma kokoman pe', me a maaka in a ma taate' pe'. ³⁴Ivëh, no a ma kiun va po Puk pe Sosoenën to sosoe suk va ne manih pan,

“Eteh to nat vahik voh en pa ma kokoman pe Sunön,
me eteh to he'he' non sih poan a ma kokoman?”

Ais 40:13

³⁵“Ahik rakah ta pah te' to he' voh e Sosoenën ta tah,
pare' iu non a ö ne' se piun hah ke poan.

Ahik rakah!”

Job 41:11

³⁶Oman, a ma tah kurus to tane' voh ma' manih pe Sosoenën, ka manih varoe ko pe', ka ma moeh tah kurus te' ne, ka ma moeh tah kurus poë varih te' suk ne a vih pe'. Ea se këëkë tamoaan rakah no eah. E' rakah a ö ne' se te' tamoaan va non! Oman.

^e 11.29 [... manih pa napan ne' to vate', ...] A napan varih ne' to vate', ee a ma to Jiu', me o te' varih to hikta te' ne pan ee ro Jiu'.

Ea Se He' Rakah A Ma To'to' Pea Manih Pe Sosoenën

12 ¹Ivëh, kö' hinhin vakis rakah e no' peöm a kën poaneo' va po vaman, manih pa ëhnan e Ieesu', eöm se he' avoes rakah a ma to'to' peöm manih pe Sosoenën, vamanih po he' vëh o to'to'. Suk a ö ne Sosoenën to vataare voh a ra o ururuan pe'. A ma to'to' peöm varih ne Sosoenën to vaneah non, se te' voon ne, ko te' vih ne manih po epep pe'. Ivëh, köm se kë rakah nem a ëhneah pa ma kupu peöm, suk eöm to inan voh em pa ma vih ne' to nok voh ka neöm. ²Paröm nat nem ririu va nem manih pa ö no a napan va po oeh vëh to ririu va nee sih. Eöm se vavoon a ma kokoman peöm, marën a ö nöm se te' nem pa vavoon tamooan hah a ma to'to' peöm. Eöm se keh nok va nën, eöm se inan em, paröm maaka em pa ö ne Sosoenën to iu non, a ö nöm se ririu va nem. E' to iu non a ö nöm se ririu va nem manih pan, eöm se nonok nem a ma taate' vih, me a ma riu peöm se te' totoopin non, me a ma taate' peöm se vavaeö i ne poë.

Ea Se Nonok Rakah No A Ma Kiu Va Pa Ma He' Ne Sosoenën To He' Voh A Ra

³E Sosoenën to ururuan voh a neo', pare' vate' va ka neo' manih pe tövavaasis peöm. Ivëh, kö' vakömköm e no' peöm papaeh. E' hikta vih non pa ö nën se këëkë koman hah a nom, parën nat nom koman nom pan, eën to vih oah e nom pa ö nën to te' va nom. Eën se kokoman hah a nom, ko kokoman pën te' vatoe me non o vaman ne Sosoenën to he' voh a oah. ⁴Ea papaeh to te' me no o sionin to te' me non a ma ö peo, ka ma ö poë varih to te' me ne a ma kiu vakëkëh. ⁵E' to vatoe akuk va kov e non manih, pea to peo. Ivëhkëk, manih pe Ieesu' Kristo na to te' no o pöh sionin ro. Kea papaeh to te' va no manih pa ma meh ö va po sionin pamëh, a ma papaeh ö to vatös me ne a ma meh ö kurus va po sionin. ⁶Ea kurus to te' no a ma he' vakëkëh, ka ma papaeh he' poë varih na to öt suk no, o ururuan ne Sosoenën to he' a ra. A te' vëh to te' me non o he' va pa vanënën soe, e' se vakiu rakah o he' pamëh, pa taate' to vapöh kokoman me non a tah ne' to vaman non, pan e Sosoenën to soe ke poan. ⁷E' se keh te' me non o he' va pa va'aus o upöm, e' se vava'aus rakah me non o kupu pe'. Ke' se keh te' me non o he' va pa vavaasis, e' se vavaasis rakah me non o kupu pe'. ⁸Eteh to te' me non o he' va pa vakikis o upöm te', e' se te' rakah non pa vakikis o upöm. Ketehe to te' me non o he' va pa he' va'aus o upöm te', e' se te' rakah non pa he' vatëh. Ketehe to te' me non o he' va pa sun vamanih pa te' susun, e' se sun vakis rakah non pa vovoh ke ra napan. Ketehe to te' me non o he' ururuan, e' se ururuan rakah me non o vaeö.

⁹Eöm se vataare tamooan rakah nem o iu peöm manih po upöm peöm. O iu pamëh se tane' rakah non ma' pa ma komëneöm. Eöm se koe rakah

a taate' hat, ko iu varoe rakah nem a nok a ma taate' vih. ¹⁰Eöm se iu koman rakah nem o upöm peöm, vamanih pa ö nöm to iu va nem sih a ma kën kea koman peöm. Paröm ta rakah nem a ëhnëëra ma meoh te' peöm, ka ëhnëëre se apuh oah non a ma ëhnëëneöm. ¹¹A ma poen kurus nöm se nat nem kakarauh nem, paröm koe ka Tuvuh Vasio' ësës non manih pa ma kupu peöm, pa nok a kiu pe Sosenën. ¹²Eöm se te' vaeö nem, suk eöm to anoeh avoe' e nem pa ma tah ne Sosenën to vamatop keon voh ka neöm. Eöm se sun vakis nem pa tëëm no punis se nö ma', paröm nat nem anoeh in a taate' hin pa ma poen kurus.

¹³Eöm se va'aus a napan pe Sosenën varih to kökööt ne pa ma meh tah. Eöm se vaeo ho o upöm te' va pa ma meh muhin varih o arus manih pa ma iuun peöm, paröm matop vavih nem raeo.

¹⁴Eöm se hin e Sosenën, ke' tapui o te' varih to kehkeh mirö' a ne neöm, a, eöm se nat nem hin eah, pan e' se tek raeo, ivëhkëk, eöm se hin varoe eah, ke' tapui raeo. ¹⁵Paröm vaeö me ro te' varih to hara' ne o vaeö, ko tamak va'peh me o te' varih to hara' ne o tamak. ¹⁶Eöm se te' vakamö' nem, paröm koe a kë koman hah ëm. Ivëhkëk, eöm se vamomhë me nem o te' varih to hikta te' ne to ëhnan. Paröm nat nem koman nem pan, eöm to para' natnat.

¹⁷Ka te' se keh nok a hat manih peöm, koe a piun hah keah, a hat ne' to nok manih peöm. Paröm punö' pa nok ataeah no a napan to koman ne to te' vih non. ¹⁸Paröm punö' vakis rakah pa te' vakamö' me a napan kurus. ¹⁹⁻²⁰Eöm varih nö' to iu no', koe a te' vamanih pa te' kiiki vöhio', paröm vakmis o upöm te', suk a ö nee to nok a hat manih peöm. Ivëhkëk, eöm se koe ke Sosenën kiiki raeo, pare' vakmis raeo me o heve pe', vamanih pa ö ne' to soe vavoh manih po Puk Vapenpen,

“Eö' koman se kiiki,
parö' vakmis a napan varih to nok a hat.
Eö' se piun hah ke raeo a ma hat
nee to nok voh.”

Lo 32:35

Ivëh, ka soe pe Sosenën to soe va non manih pan,

“E tövakihat pën se keh maë,
kën makën eah,
ke' se keh manoe,
kën vakaak eah.

Ka tëëm nën to nok va nën,
eën se he' rakah eom pe' po poet.”

Prov 25:21-22

²¹Eöm se koe a kunah ke a hat pa meh te', ke' vöknah a neöm, paröm vöknah varoe koe in a ma taate' hat, nee to nok manih peöm pa taate' vih peöm.

Ea Se Tënan Rakah No A Ma Taate' Pa Kaman

13 ¹Ea kurus rakah se te' no paan a ma susun pa kaman, pe' a hikta pah te' to vovoh akuk non sih. Suk e Sosenën koman to he' voh

raoe a tasun me o kikis va pa matop a napan. Ivëh, ka kuru no a hikta pah te' to antoen non a matop a napan, pa ö ne' to hikta te' me non o kikis pe Sosoenën. ²Ivëh, ko te' varih to vasosöë me ne a ma soe pa kaman, ee to vasosöë pet me e ne pa tah ne Sosoenën to vate' voh. Ka tëëm nee to nok va nën, ee se he' koman hah rea a punis. ³O te' varih to nonok ne sih a ma taate' totoopin, to hikta se naöp i ne a ma susun pa kaman. O te' varoe varih to nonok ne a ma taate' hat, ee se nanaöp ne. Eën se keh hikta iu naöp nom a ma susun pa kaman, aeoh, eën se nonok rakah nom a ma taate' totoopin, parën suksuk nom, kee sih kë po' ne a ëhnöömah. ⁴A te' susun pa kaman, e' a te' kikiu pe Sosoenën, e' marën a va'aus a oah. Pare' matop vavih ka nom oah, kën te' vavih nom. Ivëh, kën se keh nonok nom a ma taate' hat, eën se nanaöp e nom pe'. Suk ataeah, e' to te' me non o rapis rë.^f Ko rapis rë pamëh ne' to öt non, suk e' a te' kikiu pe Sosoenën. Ivëh, ka te' se keh nok a taate' hat, a kaman se vakmis en pe'. ⁵Ivëh, kën se te' nom paan a kaman, pe' a taate' vih ipamëh, me a ö ne' toma' vakmis a oah.

⁶E' a ö nën to he'he' suk pet nom sih a takis. A ma susun pa kaman, ee a nap kiu pe Sosoenën, ka ma tamoan nee to te' eh rakah e ne pa matop a ma kiu ne Sosoenën to he' raoe. ⁷Ivëh, ko te' varih nën to hin voh a ma tah manih pee, nën se piun hah ke raoe a ma tah nën to hin voh. Eën se he' a ma moeh takis manih po te' kokon takis. Parën ta nom o te' varih na se ta no, ko kë nom a ëhnëero te' varih na se kë no a ëhnëere.

A Taate' Va Pa Iu O Upöm Te'

⁸Eöm se nat nem koek nem to ötop, ke' te' non. A pah ötop ro ko nom se te' tamoan me nem, ivëh, iu a meh te'. Suk ataeah, a te' vëh to iu non o upöm te', e' to vatet vahik rakah en pa ma Vavaasis kurus pe Mosës.

⁹Eöm se nat vavih rakah nem a ma soe vaënpan varih po Vavaasis pe Mosës, ee to soe va ne manih pan,

“Eën se nat nom koroh vëtkin me a te' nën to hikta me nom,” *Lo 5:18*

parën nat nom ip vamët a meh te',” *Lo 5:17*

parën nat nom kaveo,

parën nat nom manin a ma tah po upöm te'.” *Lo 5:19*

A ma soe vaënpan poë varih, me a ma te' varih nö' to hikta kiun manih, ee to te' va ne manih a pusun in a soe vaënpan vëh,

“Eën se iu nom o upöm te' vamanih pa ö nën to iu hah va ka nom.”

Lev 19:18

¹⁰A te' vëh to te' me non a taate' iu te', e' to hikta onöt non a nok vahat o upöm pe'. Ivëh, ka taate' iu te' to vavatet vavih rakah e non po Vavaasis pe Mosës.

^f 13.4 O rapis rë to te' va non manih pa tasun me o kikis ne Sosoenën to he' a te' susun pa kaman.

¹¹Eö' to sosoe ka no' neöm a ma taate' varih, suk ea to nat e no pa tääm vëh kuru, to vatët e non pa hik. E' a tääm na se ut vavih rakah no ko opoep no. Suk ataeah, o poen ne Sosenën to iu kon vahik hah a rora, to pah te' vatët rakah këh e non po poen na to he' voh o to'to' pea manih pe Ieesu'. ¹²A popoen to vatët en pa hik, ka potan öök vatët en. Ivëh, ka se nat no nonok no a ma taate' popoen, para vaho' o ohop vapus pea marën a vapus pip aa manih pe susun po ora' hat. ¹³Koe, ka te' me no a taate' totoopin vamanih po te' to te' ne po maaka. Ea se nat no nonok no ta ma taäen tapeat, me a taate' kaak vaoah. Ea se nat no te' rakah no pa ma vu taate' te'te'vaasi', me a taate' hat koroh vëtkin kaveo, me a taate' heve ko vapus, me a taate' puhio'. ¹⁴Ea se he' aa manuh pe Ieesu' Kristo, para koe a vavaeö aa pa ma iu hat va pa komaara.

Koe A Kö O Upöm Te'

14 ¹Eöm se vatompoan vavih me a te' vëh no vaman pe' to hikta te' eh non, ke' hop ma' po kum peöm. Paröm koe a vasosöe suk a ma ö nöm to koman vakëkëh va nem. ²A pah te' to vaman va non manih pan, e' to te' vih e non pe' pa äen a ma moeh taäen kurus. Ivëhkëk, a meh te' vëh no vaman pe' to töötö, e' to vaman va non manih pan, e' to vih e non pe' pa äen varoe a pö'. ³A te' vëh to nat va non manih pan, e' to te' vih e non pe' pa äen a ma moeh taäen, e' se nat non kökö non a te' vëh to ënëen varoe non sih a pö'. Ka te' vëh to ënëen varoe non sih a pö', se nat non ep vöknah non a te' vëh to ënëen non sih a ma moeh taäen kurus, pan e' to nonok e non pa hat. Suk ataeah, e Sosenën to vatompoan vavih me voh en pee pon. ⁴Eën eteh, kën kiiki nom a te' kikiu pa meh te'? E' se keh sun vakis e non pa nok vavih a kiu pe', ke', e' se keh hikta sun vakis non pa nok vavih a kiu pe', e' a tah koman pe torara pe'. Ivëh, ke' se sun vakis e non pa nok a kiu pe', suk ataeah, e Sunön to toon vakis e non pe' pa nok vavih a kiu pe'.

⁵O upöm te' to koman ne pan, o pöh poen to apuh oah e non pa ma meh poen. Ka meh to koman non pan, a ma poen kurus to vatoe e ne. Ivëhkëk, a ma papaeh te' se keh vaman va ne manih pan, o poen vëh ne' to vaman non to te' vih e non pe', e' a tah koman pe' pa ö ne' to vaman va non. ⁶O te' varih to koman ne pan, o pöh poen to apuh oah e non pa ma meh poen, ee to koman va ne nën marën a vavaeö e Sunön. Ko te' varih to ënëen ne sih a ma moeh taäen kurus, to ënëen suk ne a ö nee se vavaeö e Sunön, pare sosoe vavihvih pet ke ne sih pe Sosenën, pa ma taäen nee to ënëen ne sih. O upöm te' varih to kokoe ne sih a äen a ma meh taäen, ee to kokoe suk ne a ö nee se vavaeö e Sunön, pare sosoe vavihvih pet ke ne sih pe Sosenën, pa ma te' taäen varih nee to nat ne a äen. ⁷⁻⁸A hikta pah te' to te' to'to' suk non sih o iu koman pe'. Ka hikta pah te' to mëtmët suk non sih o iu koman pe'. Ivëhkëk, ea se keh te' to'to'

no, ea to te' to'to' suk e no po iu pe Sunön. Ka se keh mët ro pet ee, ea to mët suk ee po iu pe Sunön. Ivëh, ka se keh te' to'to' e no, ke', ea se keh mët ro ee, ea se te' avoe' e no a napan pe Sunön.

⁹Ka pusun in a ö ne Ieesu' to mët, pare' sun tane' hah pa nap mët, e' marën a ö ne' se tavus e Sunön pa nap mët, me ra nap to'to'. ¹⁰Eën eteh, kën kiiki nom a kën pömah manih pa ëhnan e Ieesu' Kristo? Parën koman suk nom ataeah pan, eën to vih oah e nom pee? Ea kurus se sun amot ee pa matan e Sosoenën marën a ö ne' se kiiki a ra. ¹¹Pe' to kiun va non manih po Puk pe Sosoenën, pare' soe non pan,

“A soe pe Sunön iva'ih,
 ‘Suk rakah a ö nö' to te' to'to' no’,
 A napan kurus va po oeh se vatokon manih pa mataneo',
 pare soe tavus va ee manih pan,
 ‘Eën e Sosoenën.’ ”

Ais 45:23

¹²Ivëh, ke ea papaeh se soe tavus koman ke Sosoenën a pusun in a ma taate' kurus na to nok voh.

Koe A Nok O Upöm Kee Ku' Pa Hat

¹³Ivëh, ka se koe a kiiki a taate' po upöm te' va po vaman, para koman vahat no rae. Para koe a nok ataeah to antoen non a mirö' a ma kokoman pee, kee ku' pa taate' hat. ¹⁴Eö' to vatös me no' e Ieesu' Kristo, ivëh, kö' vaman rakah e no' pa hikta pah taëen to te' hat non pa eën. Ivëhkëk, a te' se keh ep va non ta pah tah manih pan e' to hat, a tah pamëh to hat e non pe'. ¹⁵Eën se keh vahara' vahat o vaman pa kën pömah manih pa ëhnan e Ieesu', suk a ö nën to ënëen nom a taëen nee to hikta ënëen ne, eën hikta vavatët rakah nom a taate' iu te'. Koe a mirö' o vaman po upöm peöm, pa ö nën to ënëen nom a taëen, nee to koman ne pan e' to hat, suk e Ieesu' Kristo to mët suk pet me voh en pee. ¹⁶Ivëh, kën se koe a nok a tah nën to koman nom pan, e' to te' vih e non, ke' tavus vamanih pa tah no upöm peöm to sosoe ne pan e' to hat. ¹⁷Manih pa koman o Matop Vih pe Sosoenën, a eën me a kaak to hikta te' apuh ne. A ma tah apuh oah ivarih pan, ea se vatet no a ma taate' totoopin, para vakamö' vavih me no o upöm pea, ko te' vaeö me no rae. A ma tah kurus poë varih to tane' ma' pa Tuvuh Vasio'. ¹⁸Suk a te' vëh to vavatet non sih e Ieesu' Kristo pa tëem ne' to suksuk non a ma taate' poë varih, to vavaeö e non pe Sosoenën, ko upöm te' se ep va e ne pe' manih pa te' vih.

¹⁹Ivëh, ka se punö' rakah pa nok a ma tah varih se vakikis ne a taate' vakamö', para vava'aus koman hah a. ²⁰Koe a vaonöt a taate' eën taëen, ke' mirö' a tah ne Sosoenën to nok voh po to'to' pe kea pën, a ma taëen kurus to vih e ne pa eën. Ivëhkëk, e' to hat e non pa eën a taëen vëh se nok e kea pën ke' ku' pa taate' hat. ²¹E' to para' vih pa ö na se koe ee pa

ëen a vöna', ke' a kaak o voaën, ke' a nok a tah vëh se nok e kea pën ke' e vameomah, ke' ku' pa taate' hat. ²²O vaman peöm se suk a ma tah poë varih, pare te' varoe rakah ne topnin in ne eöm, ke Sosoenën, paröm nat nem toon o upöm peöm, kee suk a ö nöm to vaman va nem. O upöm te' va po vaman to te' vaeö e ne pa ö nee se keh nonok e ne pa ma taneah nee to koman ne pan, e' to te' vih e non, pare hikta se hara' ke ne pan, ee to teen ne ta tah. ²³Ivëhkëk, o te' varih to ënëen ne a ma taëen, pare te' me ne o pöök kokoman, ee to nonok e ne pa hat, suk ataeah, ee to hikta vaman va ne manih pan, ee te' vavih kov e ne, ke' ahik. Ataeah no o te' to nonok ne, no vaman pee to hikta soe vaonöt ke non raoe, ee to nok ee pa hat.

15 ¹Ke ea varih a napan to te' me no o vaman kikis, ea se te' a punis va pa va'aus, me a vakikis o vaman po te' varih no a ma vaman pee to hikta te' kikis ne. Ea se nat no vavaeö koman hah a no. ²Ke ea a papaeh te' se kiu vakis pa vavaeö a ma kea pea, marën a ö nee se tavus vavih, ko vaman pee kikis. ³Ea to nat vavih rakah e no, e Ieesu' Kristo to hikta te' to'to' suk voh non a ö ne' se vavaeö koman hah ea, ahik, e' to tanok suk voh, a ö ne Kristo to soe vavoh in e Sosoenën manih koman o Puk Vaëhëh, pare' soe vamanih pan,

“A tëëm no a napan to soe vahat a oah,
e' to vahara' vahat en peö!”

Sng 69:9

⁴A ma soe kurus varih to kiun ne po Puk Vapenpen, nee to kiun suk voh marën a vavaasis a ra, ka sun vakis manih pa te' a punis, me a ö ne' se vakikis a ra, ka se anoeh no a ö ne Sosoenën se tapui a ra pa ma tah varih no a ma kiun va po Puk Vapenpen to vavaato suk ne. ⁵A taate' sun vakis manih pa te' a punis, me a taate' va pa vakikis o upöm te' to tane' voh ma' manih pe Sosoenën. Ivëh, kö' hinhin no' pan, e Sosoenën se va'aus kurus a neöm pa vapöh kokoman me o upöm peöm, vamanih pa ö ne Ieesu' Kristo to iu va non. ⁶Köm se po' vaöt koren, paröm pët he' o ëhnan manih pe Sosoenën, e Taman e Sunön pea Ieesu' Kristo.

**A Soe Vih Pe Ieesu' Kristo, E' A Tah Po Jiu', Me
O Te' To Hikta Te' Ne Pan Ee Ro Jiu'**

⁷A ma tah kurus nö' to vavaasis voh a neöm pan, eöm se vatompoan vavih koman hah me o upöm peöm vamanih pa ö ne Ieesu' Kristo to vatompoan vavih me voh a neöm, ivëh, ko upöm te' se po' kë a ëhnan e Sosoenën. ⁸Eö' to iu soe hah ka no' neöm pan, e Ieesu' Kristo to tavus voh a te' kikiu po Jiu' marën a va'aus raoe. E' to nok vavoh nën pa vataare pan, a ma soe pe Sosoenën manih pa kën sipuiiro Jiu' to te' man e ne. ⁹E' to nok suk pet vavoh nën pan, o te' varih to hikta te' ne pan ee ro Jiu' se kë a ëhnan e Sosoenën, suk o ururuan vëh ne' to he' voh raoe vamanih pa ö ne Devit to soe vavoh manih pa ma kiun va po Puk Vaëhëh,

- “Eö' se kë peah a ëhnöömah pa topniira napan varih to hikta te' ne pan ee ro Jiu'.
- Parö' kë a ëhnöömah po vaëhëh.” *Sng 18:49*
- 10 A ma kiun va po Puk pe Sosenën to soe pet va e ne manih pan,
 “Eöm varih a napan to hikta te' nem pan eöm ro Jiu',
 eöm se vaeö va'peh rakah me ra napan pe Sosenën.”
 Vaëö rakah peöm varih to hikta te' nem pan eöm ro Jiu',
 eöm se vaeö va'peh me ra napan pe Sosenën.” *Lo 32:43*
- 11 A ma kiun va po Puk Vaëhëh to soe pet va e ne manih pan,
 “Eöm varih a napan to hikta te' nem pan eöm ro Jiu',
 eöm se kë a ëhnan e Sunön.
 Eöm kurus a napan se kë a ëhnaneah.” *Sng 117:1*
- 12 A te' vanënën soe vëh e Aisaëa' to soe me voh en pan,
 “E sunön voon se tane' ma' po vute' pe Jësi'.
 E' se nö ma' pa matop a napan varih
 to hikta te' ne pan ee ro Jiu',
 A napan kurus poë varih to anoeh me ne sih o vaman
 pa ma tapui ne' se he' raeo.” *Ais 11:10*
- 13 Ivëh, kö' hinhin ka no' na neöm manuh pe Sosenën pan, e' se va'aus a neöm, köm anoeh me nem o vaman pa ma tapui varih ne' se he' a neöm. Pare' vapuh a neöm po vaeö me o vakamö' pa tëëm nöm to te' nem pa vaman eah, marën a ö ne eöm varih to te' me nem o kikis pa Tuvuh Vasio' se puh vavih rakah pa taate' anoeh a ma tah ne Sosenën to vamato keon to he' a ra.

E Pöl To Vavaato Suk Non A Kiu Pe'

14 Eöm a kë kea peö' varih nö' to iu vörep no', manih po kokoman peö', eö' to vaman rakah e no' peöm to puh vamaman rakah e nem pa taate' vih. Eö' to nat e no' peöm to te' rakah me e nem po nat, paröm antoen rakah e nem pa vavaasis o upöm peöm. 15-16 Eö' to kiun ke voh eo' nös peöm pa to, to kikis amot, suk eö' to iu no' pan, eöm se nat nem a tah pamëh. Eö' to toto vavoh no' nën, suk e Sosenën to he' akuk voh en peö' pa tasun va pa tavus vamanih, pa te' ësës he' pe Ieesu' Kristo, manih po te' varih to hikta te' ne pan ee ro Jiu'. A kiu peö' a te' ësës he' ivëh,^g a vatvus a Soe Vih pe Sosenën manih po te' poë varih, ko nok raeo kee tavus vamanih po he' no a Tuvuh Vasio' to vavivihan raeo, marën a he' vaeö e Sosenën.

17 Ivëh, kö' para' vaeö vi pa ö ne Ieesu' Kristo to te' va'peh me a non neo', kö' nonok no' a kiu pe Sosenën. 18-19 Eö' hikta se vaato suk hah no' ta meh tah, a pah tah ro ko nö' se soe tavus ka neöm ivëh, a ö ne Ieesu'

^g 15.15-16 E Pöl koman to hikta te' non pan e' a te' ësës he' po Jiu'.

Kristo to kiu va'peh me a non neo' sih, pa va'aus a napan varih to hikta te' ne pan ee ro Jiu', kee pënton poë. E' to nok a tah pamëh pa ö nee to pënton a neo' to vaato, pare ep in a ma tah nö' to nok. Ee to ep ka neo' to nok a ma tah vatoksean to para' vamamanë', pare vaman ee pe Sosoenën, ee me to vaman e Sosoenën, suk o kikis pa Tuvuh Vasio' to va'aus raeo, kee vaman.

Eö' to vatvus ma' a Soe Vih pe Ieesu' Kristo manuh Jerusalëm, parö' vatvus vahik a soe manuh Jerusalëm, ko vatvi ma' ko öök ma' pa muhin va Ilirikum, ko vaaton nën. Ke' te' va non manih, peö' to vahik voh eo' po pöh hum in a kiu peö' nën. ²⁰Eö' to iu tamoaan rakah no' sih a vatvus a Soe Vih pe Ieesu' Kristo, manih pa ma vöön no a napan to hikta nat avoe' i ne a ëhneaneah. Suk ataeah, eö' to hikta iu vatok no' a kiu peö' pa ö no a meh te' to vatvus voh en pa Soe pamëh nën. ²¹Suk ataeah, e' to kiun suk non e Kristo manih pa ma kiun varih po Puk pe Sosoenën pan,

“O te' varih nee to hikta soe ke voh raeo o vahutët pe',
ee se ep inan ee pe'.

Ko te' varih to hikta tēnan voh o vahutët pe',
se maaka ee.”

Ais 52:15

E Pöl To Koman Non A Vavih Manih Room

²²Ke' a ma tah akuk ko poë varih to susunpip voh a non neo', kö' hikta onöt no' a nö nös pa ep a neöm. ²³Kuru va'ih, nö' to hikta te' hah me no' ta meh kiu manih. A ma kirismas peo rakah nö' to iu ep voh ka no' neöm. ²⁴Ivëh, kö' koman no' pan, eö' se nö nös, parö' ep momoan voh ka neöm, parö' oah pet po' manuh pa muhin va Spen. Eö' to koman no' a te' vaeö va'peh me a neöm pa tah ma si' poen, parö' koman va no' manih pan, eöm se va'aus a neo' pa vavih peö' manuh Spen.

²⁵Ivëhkëk, eö' hikta koman no' a nö nös kuru, suk eö' to iu no' a nö momoan voh pa va'aus a napan pe Sosoenën varih to te' ne Jerusalëm. ²⁶A napan va po vaman varih to te' ne manih pa muhin vëh Mësadonia', me manih pa muhin va Akaëa', to vaeö rakah e ne pa he' a moni' pee pa va'aus a napan pe Sosoenën, varih o Jiu' to te' ne Jerusalëm. ²⁷Ee to he' voh a ma moni' poë varih, suk o iu koman pee. Suk ataeah, ee to te' me ne a tah to matan va non manih pa ötop nee se piun ke ro Jiu'. O te' varih to hikta te' ne pan ee ro Jiu' to kon tane' voh a ma pah ö va pa ma tah vihvih to va'aus non a ma apeere, manih po Jiu'. Ivëh, ka napan varih to hikta te' ne pan ee ro Jiu' se va'aus varu' o Jiu' pa ma tah vihvih va po oeh.

²⁸Eö' se keh nat vahik eo' pan, a nap arus varih Jerusalëm to maaka e ne pa tah nee to he' suk raeo a moni' pamëh, eö' se nö nös manem Spen, parö' ep ate' ka neöm. ²⁹Eö' to nat e no' o poen nö' se nö nös manih peöm, e Ieesu' Kristo se vapuh rakah en pea pa tapui pe'.

³⁰Kën poaneo' manih pa ëhnan e Ieesu', eö' to iu no' a ö nöm se vatös me a neo', ka pët te' a punis nö' to te' me no', ka manih pa ma hin peöm, nöm se hinhin va'aus a nem neo', ke Sosoenën se va'aus a neo'. Suk a ö na to pët vaman no sih e Ieesu' Kristo e Sunön pea, va'peh me o iu no a Tuvuh Vasio' to he' voh a ra. ³¹Paröm te' pet nem pa hin, ke Sosoenën se matop ka no neo' manih pa napan varih to hikta vaman ne e Ieesu' manih Jiutia', me a ö no a napan pe Sosoenën se vaeö pa öt a moni' vëh nö' to te'te' ke no' raoe manih Jerusalëm. ³²Ke Sosoenën se keh iu non, eö' se nö nös peöm me o vaeö, ka se pët kon a tëëm pa vanot.

³³Eö' to hinhin suk ka no' neöm, pan e Sosoenën to te' me non a taate' kamö', se te' va'peh me a no neöm. Oman.

E Pöl To He' A Soe Vih Manih Pa Napan To Kon O Vaman

16 ¹Eö' to vaeö me no' e vameera Fibi', e' a te' to vava'aus non sih o kum te' varih to vaman ne e Ieesu' manih pa vöön va Sënkria'. ²Eö' to iu hin no' a neöm, pan eöm se öt eah ko matop vavih nem eah, vamanih pa ö ne ea a napan pe Sosoenën se te' va no. Suk e'e' me a meh te' pe Sunön. Eöm se vava'aus nem eah pa ma taneah ne' to iu non, suk e' to va'aus voh a neo' me ro upöm te' peo rakah.

³⁻⁴Eöm se he' a potan vih peö' manih pe Prisëla' me Akuila', ee a poa tom manot to kiu va'peh me a ne neo' sih manih pa kiu pe Ieesu' Kristo. Ee to öra tatek voh ee, me a ö nee to öra mët voh ee, pa ö nee to kehkeh va'aus ne o to'to' peö'. Eö' to vavihvih rakah me no' raoe, ka ma kum te' kurus varih to hikta te' ne pan ee ro Jiu' to vaman ne e Ieesu', ee me to vavihvih rakah me ne raoe.

⁵Paröm he' me a potan avih peö' manih po kum napan varih to vaman ne e Ieesu' to vatötönun ne sih manih pa iuun pee. Paröm he' me a potan avih peö' manih pe vamomhë vih peö', e Epaënetus. E' voh a te' vamomoaan va pa muhin va Esia' pa vatet e Ieesu' Kristo.

⁶Paröm he' me a potan avih peö' manih pe Maria' vëh, to kiu vëhva' rakah voh non pa va'aus a neöm.

⁷Paröm he' me a potan avih peö' manih pa poa te' poaneo', Andronikus, pen Junias varih, möm to te' va'peh voh nem pa nohnoh. Ee voh a poa te' apuh to te' hop ne manih po kum te' varih, to te' va'peh me ne o aposol. Ee pon to vaman vovoh voh ka neo' manih pe Kristo.

⁸Manih pa ëhnan e Sunön, eöm se he' a potan avih peö' manih pe vamomhë vih peö', e Ampliatas.

⁹Paröm he' me a potan avih peö' manih pe Urbanus, e' a te' kikiu, to kiu va'peh me voh a no neo' sih manih pa kiu pe Ieesu' Kristo. Paröm he' pet na a potan avih peö' manih pe Stakis, e' e vamomhë vih peö'.

- 10 Paröm he' me a potan avih peö' manih pe Apeles vëh, nee to punö' voh o vaman pe', ivëhkëk o iu pe' to para' kikis manih pe Ieesu' Kristo.
Paröm he' me a potan avih peö' manih pa tapaiuun pe Aristobulus.
- 11 Paröm he' a potan avih peö' manih pe poaneo', e Herodion.
Paröm he' me a potan avih peö' manih pa kën tom sinan pe Narsisus, varih to te' ne po kum pe Sunön.
- 12 Paröm he' me a potan avih peö' manih pe Trifina' pen Trifosa'. Ee a poa köövo to kiu vëhva' rakah ne sih pa nok a kiu pe Sunön.
Paröm he' me a potan avih peö' manih pe Persis, e' e vamomhë vih peö'. E' me to kiu vëhva' rakah voh non pa nok a kiu pe Sunön.
- 13 Paröm he' me a potan avih peö' manih pe Rufus, e' a te' nö' to iu oah rakah no' sih manih pe Sunön, me manih pe sinaneah vëh, to nonok rakah vavoh ka no neo' manih pe eö' e koa' rakah pe'.
- 14 Paröm he' me a potan avih peö' manih pe Asinkritus, Flegon, Hermes, Patropas, Hermas, me ra kën kea varih to te' va'peh me ne raoe.
- 15 Paröm he' me a potan avih peö' manih pe Pilologus, me Julia', me manih pe Nereus, pen vameneah, me manih pe Olimpas, me a napan kurus pe Sosoenën varih to te' va'peh me ne raoe.
- 16 Paröm he' a soe vavihvih vivihan peöm manih po upöm peöm, vamanih pa taate' vaöt koren.
A ma kum kurus pe Ieesu' Kristo to vanö nös a ma soe vavihvih pee manih peöm.

**O Upöm Te' To Kehkeh Kök Ne Sih O Kum
Te' Varih To Vaman Ne E Ieesu'**

¹⁷Kën poaneo', manih pa ëhnan e Ieesu', eö' to sosoe vakis rakah ka no' nös neöm pan, eöm se matop nem po te' varih to kehkeh ki a no neöm sih, köm vasosöeri me nem o upöm peöm, pare mimirö' ne sih o vaman po upöm te'. Ee to kihkiuh rakah e ne sih po vavaasis man nöm to kon voh, ivëh, köm se te' varo rakah këh nem raoe. ¹⁸A pap napan poë varih to hikta suksuk ne e Ieesu' Kristo. Ee to nonok varoe ne sih a ma tah to he' vaeö koman hah a ne. A ma vaato pee to para' momona, marën a vanun a ma kokoman po te' varih to hikta nat ne pataeah ivëh a hat. ¹⁹A napan kurus to pënton voh ee pan, eöm to vavatet rakah e nem sih pa taate' pënton soe, ivëh, nö' to hara' vaeö suk a no' neöm. Ivëhkëk, eö' to iu no' a ö ne eöm se te' maaka rakah nem pataeah to te' vih non, me a ö ne eöm se nat nem teen nem ta tah hat.

²⁰A si' ö hat ke Sosoenën vëh to he'he' non sih a taate' vakamö', se vöknah en pe susun po ora' hat, pare' he' en peöm po kikis marën a vöknah eah.

O ururuan pe Sunön pea Ieesu' Kristo to te' me a no neöm.

²¹ E Timoti' a te' to kiu va'peh me a no neö' sih, to vanö nös a potan avih pe' manih peöm va'peh me a ken poaneo' varih, e Lusius, me e Jeson, me e Sosipater.

²² Eö' e Tertius, a te' to kiun o vaato pe Pöl po pëpa' vëh, parö' vanö nös a potan avih peö' manih peöm pa ëhnan e Sunön.

²³ E Gaëus to vaonöt ka neo' e Pöl, me o kum te' kurus varih to vaman ne e Ieesu', kemöm vatötönun manih pa iuun pe'. E' me to vanö nös a potan avih pe' manih peöm, va'peh me e Erëstus, a te' to matop non sih a moni' pa kaman manih pa vöön vëh, me e kea pea e Kwartus.

²⁴⁻²⁶ ^h Eö' to kë no' a ëhnan e Sosoenën to antoen non a vakikis rakah o vaman peöm, vamanih pa ö no a Soe Vih vëh nö' to vavatvus suk no' sih e Ieesu' Kristo to soe va non. Eö' to soe tavus a ö ne Sosoenën to vamaaka vah va in a ma tah vakoaan varih to vakoaan voh ne pa ma tamoaan. Ivëhkëk, kuru ne' to vataare vamaaka en pa ma tah poë varih. Emöm to vatvus a ma tah no o te' vanënën soe to kiun voh. Emöm to vatvus o kiun pamëh suk e Sosoenën vëh to hikta antoen non a mët to ta' a möm a nok. E' to nok va nën marën a ö no te' kurus varih to hikta te' ne pan ee ro Jiu' se vaman e Ieesu' Kristo, ka manih pa taate' pamëh nee se pënton koe a soe pe Sosoenën nën.

²⁷ Ea to te' no a ma te' pe Ieesu' Kristo, ivëh, ka se kë rakah no a ëhnan e Sosoenën, pe e' varoe kuru to te' vamaman non o nat. Ea se koe rakah a vanot pa kë a ëhnaneah pa ma poen kurus. Oman.

^h 16.24-26 A ma meh ö kiun vamaaan va po to Grik to vatom pet o ves 24, ko soe va non manih pan, “O ururuan pe Sunön pea e Ieesu' Kristo to te' me a non neöm kurus. Oman.”